

ASO LUA, 11 AOKUSO 2015

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2014/2015.

Tatalo.

MALELEGA MAI LE SUI O LE FONO A SUI TOFIA

Na fofogaina e le Fofoga Fetalai le Malelega mai Le Sui o le Fono a Sui Tofia.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliEGA i le Fono Aoao Faitulafono e iloiloaina ai ia Tulafono Tau Faaofi ua faaalua i inei:

1. Tulafono Tau Faaofi o Teuteuga o le Tulafono o Tupe Teu Faafaigaluegaina mai Fafo 2015.
2. Tulafono Tau Faaofi o Faasalaga 2015.
3. Tulafono Tau Faaofi o Faamatalaga Molimau 2015.
4. Tulafono Tau Faaofi o le Pulega o Faiga Faiva 2015.
5. Tulafono Tau Faaofi o Teuteuga o le Tulafono o Eleele, Fuagafanua ma le Siosiomaga 2015.
6. Tulafono Tau Faaofi o Teuteuga o le Tulafono o le Faamauina o Pule o Fanua 2015.
7. Tulafono Tau Faaofi o Faiga Faatauvaga o Fefaatauaiga ma le PuiPuiga o Tagata e Faaaogaina Oloa ma Auaunaga 2015.
8. Tulafono Tau Faaofi o Teuteuga o le Tulafono o Faiga Palota (Nu. 3) 2015.

TUUIINA ATU i lou nei Lima i lenei aso 7 o Aokuso i le tausaga 2015.

(Sainia): **Tuimalealiifano Vaaletoa Sualauvi II**
SUI O LE FONO A SUI TOFIA.”

SAUNOAGA O MALIU

*Na faasilasila e le Fofoga Fetalai le tuumalo o le **Tofa TALIAOA Pita**, o Le sa avea ma sui usufono o le Palemene i Paeaiga ua mavae.*

*O le **Tofa TALIAOA Pita** sa avea ma sui usufono o le Itumalo Faaalaalafaga o Sagaga le Usoga i le Paeaiga o le 2001-2006. Sa avea o ia ma Failautusi Faapalemene i le Minisita o Tupulaga Talavou, Taaloga ma Aganuu.*

Sa avea ma sui usufono o le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa faapea le Komiti o Tofiga Faapitoa.

Ia avea ia o Au e fai ma sui o lenei Palemene e molimoli atu faamafanafanaga ma faamaisega i le itumalo, le aiga alii, le faletua ma le nofo a alo ona o le toesea o le Tama e pele i o outou lotu.

Na tutulai filemu le Maota mo le minute e tasi e faailoa ai lo latou faaaloalo i le sui usufono ua tuumalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ia e i ai le talitonuga o lea ua atoatagi le paia ma le mamalu maualuga o le tatou Maota Fono i lenei taeao. E manatu foi o lea ua tinipao le uto e pei o le faiva i vai, ua pafuga foi le a e pei o le upu i le seugagogo, aua o lea ua tatou toe aofaga potopoto le paia ma le mamalu o le Fonousu a Samoa i lenei taeao fou, ua tatou toe mimusa faatasi i le alofa ma le agalelei o le Atua i Tiafau nei o le Malae o le Faautugatagi a Samoa.

Ou te ofo alofa ma ou faatalofa atu i le tulaga aloaia i le paia ma le mamalu maualuga o le tatou Maota Fono i sui usufono mamalu uma i lenei taeao fou, i le alafai mai i faguga lelei i le afifio mai ma tala mai aao o lenei ua tatou toe aofaga potopoto i lo tatou Maota nei ona o nisi fuafuaga taua e pei ona faailoa atu muamua. Sa tatou vaoseese ona o lo outou feagai i tiute ma galuega, i le malaga atu i atunuu mamao, aemaise o le tauavagameaina o le tatou galuega e le gata i Samoa nei, ia a o itu e fia o le tatou atunuu. Sa tatou taumavae foi e pei ona tatou fono talatala ai i le Maota o Tui Atua Tupua Tamasese Efi i lena Fonotaga ua uma atu, ia a o lenei ua tatou toe fono talatala i lo tatou Maota nei i Tiafau ona o le vaiaso lenei, ia o se tasi o vaiaso taua mo le faamanatuina o le tautua ma le auaunaga a lenei Maota Fono i totonu o Paeaiga e fia mo le Malo o Samoa ma le Palemene ma le atunuu.

Ua manatu ai le Taitai o le Malo ma au nei o le Fofoga Fetalai, ua faaiugafonoina, o le vaiaso lenei, ia o le tatou vaiaso mulimuli lenei e tatou te fono ai i inei, ia ona fai ai lea o le tatou Sauniga Faapitoa i le Aso Faraile e fai ai le Lotu Faamanatu ma le Faafetai i le Atua ona o le taua o lenei Maota sa tatou feagai ai. E ave ai le tatou faamanu ma le faafetai i le Atua i nei tausaga e tele sa faaaogaina ai lenei Maota, ona o le tatalaina o le tofa ma le faautautaga i le paia ma le mamalu o sui usufono uma sa agai mai i Tiafau i tausaga e tele ma fatia ua sola ma aso ua alu, aua le taumafaiga ma le tauavagameaina o se manuia o upufai o Malo ma le tautuaina o le tatou atunuu.

O le manatu fiafia lena i lenei taeao o lea ua toe vaavaai atu o lea ua toe atoa mai tootoo fetalai ma puna fetalai o le tatou Maota i lenei taeao, ia malo le onosai, malo le faapalepale, malo le galulue. I nei vaiaso ua tuanai atu, ia sa tofu i tatou ma galuega sa faatino, ae faafetai i le Atua e le faaititia lenei taeao fou ona ua tatou toe aofaga potopoto.

E faapena foi ona oo atu se faamatalaga i le tapuaiga a lo tatou atunuu, Samoa, ia tapuai maia i lenei aso. E talitonu le faamoemoe o lo o outou tatalo pea ma tui mai le mulipapaga aua le alofaiva a lou Palemene, ia e manuia lava faiva o la outou tapuaiga. E tatalo foi aua ne i afe se atua o le ala i le tatou savaliga. Ia tatou viia le Alii, ua taulu, taulu, taulu, ia le vevela ma le mugala na i ai nei, ia o lea ua toafuafu faamanuiaga i lenei taeao, ua tatou maua uaga o faamanuiaga ma le faasusu aua le tatou vaitaumafa, aemaise foi o le fesoasoani i lo tatou siosiomaga.

Ua tatou faatasi i lenei taeao ma alo ma fanau a lo tatou atunuu i tupu ma ee mo le faaauuina foi o tatou polokalame faataatitia, i le faaauuina pea o le taua o lou Palemene. E pei ona silafia ua savali i le tolu i le fa tausaga o faia pea aoaoga faa-Semina nei e amata mai lava i tupulaga laiti, o lenei taeao ua tatou faatasi ma tupulga matutua, ua latalata lo latou soifua e agai foi e tautua nuu ma aiga, aemaise le tautuaina o itumalo ma tulaga masani ua oo i ai lo latou soifua matua.

E faafeiloai atu foi i Faauluuluga o Matagaluega a le Malo ua tatou faatasi i lenei aso, i Faalapotopotoga latou uma o lo o agai mai i le tatou Fono, ona o le tele o le tatou galuega ua uma ona faataatia.

Le Palemene, ia o lea ua outou silasila i le alafua ua maea ona tuanai atu. E i ai le faamoemoe, e tatalo atu pea le Fofoga Fetalai ina ia faaoga tatau ma faaoga atoatoa lo tatou malosi i lenei aso se i aulia le faaiuga o lenei vaiaso, ina ia oo atu ua tini tauao ma taunuu i le taunuuga o le tatou galuega ma faataatia.

TUUNA ATU O PEPA

Na tolaulauina e le Failautusi Pepa ua tuuina atu e tusa ai ma le T.T.48.

1. P.P. 2015/2016 Nu. 25, Lipoti Faaletausaga Lona 51 a le Faalapotopotoga o Esetete Tausi a Samoa mo le tausaga faaiuina aso 30 Iuni 2013.
2. P.P. 2015/2016 Nu. 26, Tali Atu a le Malo i le P. P. 2014/2015 Nu. 58, Lipoti a le Komiti o Mataupu tau Faamasinoga, Leoleo & Falepuipui i le P.P. 2013/2014 Nu. 78 & 79, Lipoti Faaletausaga a le Matagaluega o Leoleo ma Falepuipui mo Tausaga 2007/2008 ma le 2008/2009.
3. P.P. 2015/2016 Nu. 27, Tali Atu a le Malo i le P. P. 2014/2015 Nu. 137, Lipoti a le Komiti o Mataupu tau Faamasinoga, Leoleo & Falepuipui i le P.P. 2014/2015 Nu. 13, 14 & 24, Lipoti Faaletausaga a le Matagaluega o Leoleo & Falepuipui mo Tausaga 2009/2010, 2010/2011 & 2011/2013.
4. P.P. 2015/2016 Nu. 28, Tali Atu a le Malo i le P.P. 2014/2015 Nu. 102, Lipoti a le Komiti o Tupe Maua ma Tupe Totogi i le P.P.

- 2014/2015 Nu. 5, Lipoti Faaletausaga a le Pulega o Tupe Faava o Malo mo le Tausaga 2012.
5. P.P. 2015/2016 Nu. 29, Lipoti Faaletausaga a le Pulega o Uafu ma Taulaga 2012-2013.
 6. P.P. 2015/2016 Nu. 30, Faamatalaga o Sini Autu a le Pulega o Uafu ma Taulaga 2015-2017.
 7. P.P. 2015/2016 Nu. 31, Lipoti Faaletausaga a le Matagaluega o Tupe 2010-2012.
 8. P.P. 2015/2016 Nu. 32, Lipoti Faaletausaga a le Matagaluega o Tupe 2012-2013.
 9. P.P. 2015/2016 Nu. 33, Lipoti Faaletausaga a le Matagaluega o Galuega, Felauaiga ma Atinae Eseeese 2013-2014.
 10. P.P. 2015/2016 Nu. 34, Tali Atu a le Malo i le P.P. 2014/2015 Nu. 186, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua ma Suafa i le P.P. 2014/2015 Nu. 92, Lipoti Faaletausaga a le Komisi o le Toefuataiga o Tulafono a Samoa mo le Tausaga 2012/2013.
 11. P.P. 2015/2016 Nu. 39, Faamatalaga i Naunautaiga o Auaunaga 2014-2017 a le Faalapotopotoga o Suesuega Faasaienisi a Samoa. Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua ma Suafa i le P. P. Nu. 92, Lipoti Faaletausaga a le Komisi o le Toefuataiga o Tulafono a Samoa mo le Tausaga 2012/2013.

TUUNA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma T.T.51 (5).

1. P. P. 2015/2016 Nu. 35, Lipoti a le Komiti o Galuega, Felauaiga ma Siosiomaga i le Tulafono Tau Faaofi o Teuteuga o le Tulafono o le Penisini 2014.
2. P. P. 2015/2016 Nu. 36, Lipoti a le Komiti o Galuega, Felauaiga ma Siosiomaga i le Tulafono Tau Faaofi o Teuteuga o le Tulafono o le Pulega o Taulaga 2014.
3. P. P. 2015/2016 Nu. 37, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le Tulafono Tau Faaofi o Vai Pulea Tumaoti 2015.
4. P. P. 2015/2016 Nu. 38, Lipoti a le Komiti o Tupe Maua ma Tupe Totogi i le Tulafono Tau Faaofi o le Faletupe Tutotonu o Samoa 2015.

LAFO MO LE FAATAATIAESE O TULAFONO TUMAU

Susuga Hon TUILAEPFA FATIALOFA AUELUA LUPESOLIAI NEIOTI AIONO SAILELE MALIELEGAOI (Palemia): Lau Afioga i le Fofoga Fetalai, ou te muai faatalofa atu i le paia maualuga o le tatou Maota

nei i lau Afioga faapea foi le mamalu o le Maota i le maleifua mai ma le alafai mai i faguga lelei i lenei taeao fou. E faapea foi ona ou faatalofa atu i le tapuaiga a Lana Afioga Mamalu, O Le Ao o le Malo ae tainane le paia maualuga o le tatou atunuu i ona tulaga faalupelupe o lo o taputapu mai i Tualumaga o le tatou Fonotaga i lenei taeao.

Lau Afioga i le Fofoga Fetalai, ou te faatu le lafo, *Ina ia faataatiaese Tulafono Tumau 100 (1), ina ia avanoa ai le faitauga faalua i le aso Fono e sosoo ai o Tulafono Tau Faaofi ia o le a faitauina muamua i le aso Fono lenei.*

Faaluaina e le Sui Palemia, Minisita mo Pisinisi, Alamanuia ma Leipa, Minisita mo Galuega tau Alamanuia ma Atinae a le Malo, ma le Minisita mo Fesootaiga ma Faamatalaga Tekonolosi.

Na faamaonia le lafo ma tulai ai Tulafono Tumau 100(1) ua faataatiaese.

**TULAFONO TAU FAAOFI O TEUTEUGA O LE TULAFONO O
TUPE TEUFAAFAIGALUEGAINA MAI FAFO 2015
- faitauga muamua**

Tofa Hon FONOTOE NUAFESILI PIERRE LAUOFO (Minisita mo Mataupu tau Pisinisi, Alamanuia ma Leipa, Sui Palemia): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Tupe Teufaafaigaluegaina mai Fafu 2015 i lona faitauga muamua.*

Faaluaina e le Minisita mo Galuega tau Alamanuia ma Atinae a le Malo.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O FAASALAGA 2015
- faitauga muamua**

Afioga Hon FIAME NAOMI MATAAFA (Minisita mo Faamasinoga ma Pulega tau Faamasinoga): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faasalaga 2015 i lona faitauga muamua.*

Faaluaina e le Sui Palemia, Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi i lona faitauga muamua.

TULAFONO TAU FAAOFI O FAAMATALAGA MOLIMAU 2015
- faitauga muamua

FOFOGA FETALAI: Tulai mai lau Afioga i le Minisita mo Faamasinoga ma Pulega tau Faamasinoga.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faamatalaga Molimau 2015 i lona faitauga muamua.*

Faaluaina e le Sui Palemia, Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi i lona faitauga muamua.

TULAFONO TAU FAAOFI O PULEGA O FAIGA FAIVA 2015
- faitauga muamua

Afioga Hon LE MAMEA LEMALU SU'A LEATUAVAO TUILETUFUGA ROPATI MUALIA (Minisita mo Faatoaga ma Faiga Faiva): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Pulega o Faiga Faiva 2015 i lona faitauga muamua.*

Faaluaina e le Minisita mo Galuega tau Alamanuia ma Atinae a le Malo, Minisita mo Tina ma Tamaitai, Atinae o Nuu, Afioga ma Agafesootai, ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi i lona faitauga muamua.

TULAFONO TAU FAAOFI O TEUTEUGA O LE TULAFONO O ELEELE, FUAGAFANUA MA LE SIOSIOMAGA 2015
- faitauga muamua

Tofa Hon FAAMOETAULO A LEALAI AULOTO ULAITINO FAALE TUMAALII (Minisita mo Punaoa Faanatura ma le Siosiomaga): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Eleele, Fuagafanua ma le Siosiomaga 2015 i lona faitauga muamua.*

Faaluaina e le Minisita mo le Soifua Maloloina, Minisita mo Aoga, Taaloga ma Aganuu, Minisita mo Galuega tau Alamanuia ma Atinae a le Malo, ma le Minisita mo Leoleo ma Falepuipui.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TEUTEUGA O LE TULAFONO O LE
FAAMAUINA O PULE O FANUA 2015 – faitauga muamua**

**Tofa Hon FAAMOETAU LOA LEALAI AULOTO ULAITINO FAALE
TUMAALII:** Lau Afioga i le Fofoga Fetalai ou te faatu le lafo, *Ina ia
faitauina nei le Tulafono Tau Faaofi o Teuteuga o le Tulafono o le
Faamauina o Pule o Fanua 2015 i lona faitauga muamua.*

*Faaluaina e le Minisita mo Leoleo ma Falepuipui, Minisita mo Galuega tau
Alamanuia ma Atinae a le Malo, Minisita mo Aoga, Taaloga ma Aganuu, ma
le Minisita mo le Soifua Maloloina.*

*Na faamaonia le lafo ma faitauina le Tulafono Tau Faaofi i lona faitauga
muamua.*

**TULAFONO TAU FAAOFI O FAIGA FAATAUVAGA O
FEFAATAUAIGA MA LE PUIPUIGA O TAGATA E FAAAOGAINA
OLOA MA AUAUNAGA 2015 – faitauga muamua**

Tofa Hon FONOTOE NUAFESILI PIERRE LAUOFO: Lau Afioga i le
Fofoga Fetalai ou te faatu le lafo, *Ina ia faitauina nei le Tulafono Tau
Faaofi o Faiga Faatauvaga o Fefaatauaiga ma le Puipuiga o Tagata e
Faaaogaina Oloa ma Auaunaga 2015 i lona faitauga muamua.*

*Faaluaina e le Minisita mo Faamasinoga ma Pulega Tau Faamasinoga, ma
le Minisita mo Galuega tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi i lona faitauga
muamua.*

**TULAFONO TAU FAAOFI O TEUTEUGA O LE TULAFONO O
FAIGA PALOTA (NU.3) 2015 – faitauga muamua**

Afioga Hon FIAME NAOMI MATAAFA: Lau Afioga i le Fofoga Fetalai
ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o
Faiga Palota (Nu.3) 2015 i lona faitauga muamua.*

*Faaluaina e le Sui Palemia, Minisita mo Pisinisi, Alamanuia ma Leipa,
Minisita mo Tupe Maua, ma le Minisita mo Galuega tau Alamanuia ma
Atinae a le Malo.*

*Na faamaonia le lafo ma faitauina le Tulafono Tau Faaofi i lona faitauga
muamua.*

MALELEGA MAI LE SUI O LE FONO A SUI TOFIA

Na fofogaina e le Fofoga Fetalai le Malelega mai Le Sui o le Fono a Sui Tofia.

“TUSI FAAMAONIA O LE TULAGA FAANATINATI

E tusa ai ma aiaiga o le Tulafono Tumau 99(2) **O AU, TUIMALEALIIFANO VAALETOA SUALAUVI II, SUI O LE FONO SUI TOFIA,** ua ou tuuina atu nei le Tusi Faamaonia o le Tulaga Faanatinati o le Tulafono ua faaali atu iinei mo le tagofia e le Fono Aoao Faitulafono i lana Fonotaga o le a usua i le Aso Lua, 11 Aokuso 2015.

1. Tulafono Tau Faaofi o Teuteuga o le Tulafono o Faiga Palota (Nu.3) 2015.

TUUIINA ATU i lou nei Lima i lenei aso 7 o Aokuso i le tausaga 2015.

(Sainia): Tuimalealiifano Vaaletoa Sualauvi II SUI O LE FONO A SUI TOFIA.

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu i Le Sui o le Fono a Sui Tofia e uiga i le Tulafono Tau Faaofi lenei, o lea o le a sagai atu loa le Fono Aoao mo le faitauga faalua.

Afioga Hon FIAME NAOMI MATAAFA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota (Nu.3) 2015 i lona faitauga faalua ma ou te fia tautala faamalamalama i ai.*

Faalua e le Sui Palemia, Minisita mo Pisinisi, Alamanuia ma Leipa.

Afioga Hon FIAME NAOMI MATAAFA: Lau Afioga i le Fofoga Fetalai ma le mamalu o le Palemene, ou te tulai atu i lenei taeo ma le agaga faaloalo e tautala ma faamalamalama le uiga ma le autu o lenei Tulafono Toe Teuteu.

Lau Afioga i le Fofoga Fetalai e 6 Fuaiupu o le tatou Tulafono Toe Teuteu. Ma o nisi nei o autu po o mafuaaga i le toe faatulai mai o lenei Tulafono Tau Faaofi. O lona vaega muamua o lo o aiaia mai ai se vaitaimi, a itiiti mai e tolu tausaga e oo atu i le aso na faauluina atu ai le Pepa o Filifiliga i le Komesina mo se sui faatu ina ia tuuina atu ai manaoga o le tautua i le nuu.

O lona lua o autu o lenei Tulafono Toe Teuteu, o le tali atu i itu e le o ogatasi ai i totonu o le Tulafono Tau Faaofi i vaitaimi e nofosala ai i le falepuipui e faasino; muamua, o le mafuaaga o le tauleagavaaina o se sui faatu e avea ma sui usufono o le Palemene i lalo o le Fuaiupu 5(5)(b)(i) lea e fa tausaga. O lona uiga o se agavaa lea e avea ai ma sui usufono.

Ma le lona lua o lea lava Fuaiupu, o le avanoa o le nofoa o sui usufono o le Palemene i lalo o le Fuaiupu 10(e) lea e lua tausaga. O lona uiga lau Afioga i le Fofoga Fetalai ma le mamalu o le Palemene, o le aveesea mai lea o le tofi sui usufono i se sui usufono o lo o avea ma sui usufono. Ona la, o lo o eseese le fa tausaga i le agavaa i le ulufale ma le tuuese a o le tofi i le taimi o lo o avea ma sui usufono lea e lua tausaga, o le auga o le Toe Teuteuga lea ia faatutusa soligatulafono ia i le 4 tausaga.

O le lona tolu o auga po o faamoemoe o lenei Tulafono Tau Faaofi, o le tuuina atu lea o le pule faitalia i le Komesina mo le toe pueina o ata o tagata palota taitoatasi mai le 10 i le 15 tausaga.

Ma o le Teuteuga mulimuli lau Afioga i le Fofoga Fetalai, o lo o aiaaia ai le aiatatau a suli, e aofia ai o latou taitoalua, o tagata o lo o i ai pe sa i ai igoa i luga o Lisi o le Faasologa o Igoa mo le itumalo faaalaalafaga o Vaimauga ma le itumalo faaalaalafaga o Faleata i le aso pe a o lumanai le Faiga Palota Aoao i le 2011 ina ia faamau ai i le Lisi o le Faasologa o Igoa i itumalo faaalaalafaga, e ui lava ina faapea e leai ni o latou sootaga i le toto i na itumalo faaalaalafaga. E tataui i suli ona nonofo mau i totonu o na itumalo faaalaalafaga mo se vaitaimi a itiiti mai e 6 masina e agavaa ai.

Lau Afioga o se faamatalaga puupuu lea mo le tatou Tulafono Tau Faaofi Toe Teuteu. Ma lou faaaloalo lava.

FOFOGA FETALAI: Faamalo atu le saunoa faamalamalama i lau Afioga i le Minisita mo Faiga Palota. E manatu foi o lea ua manino ma malamalama le faafofoga atu a le tatou Maota i lenei taeao, ae talitonu foi ua manino ma malamalama sui usufono uma ona ua maea ona tatou talanoaina, sa afio mai ai le Faauluuluga o le Matagaluega pei o tatou tulaga masani, le Sui Pule o lo o avea nei ma Ofisa o le Komesina o Faiga Palota ma le Ofisa e faamalamalama manino le aano moni ua finagalo ai le Matagaluega aemaise le tuuina mai e le Kapeneta aua le femalamalamaiga i totonu o le tatou Maota nei aemaise o le faafofoga a le atunuu.

Ia, o tulaga masani, o lea ua maea le folasaga a le Malo, o se sui usufono e fia saunoa, tulai mai mo le 20 minute. E talosaga atu i sui usufono ia apoapo le tatou taimi, saunoa sao i Teuteuga o le Tulafono Tau Faaofi, ae le o se lauga faalauaite i le Tulafono a le Komesina o Faiga Palota.

O le tatalo lea ma le talosaga atu i sui usufono mamalu. Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO (Faleata Sasae): Faafetai i lau Afioga i le Fofoga Fetalai i lenei taeao matagofie ua tatou toe feiloai ai i luma o le nuu ae le o tua o le nuu, i pue o manu ae le o pue o mala. Faafetai foi ua tatou toe feiloai fiafia i lenei aso. E faatalofa atu i le Afioga i le Palemia ma le mamalu o le Kapeneta aemaise Sui Minisita aemaise foi Ofisa Sili o Pulega ma Pule Sili o Matagaluega ma Faalapotopotoga taitasi, ae faapea foi alo ma fanau ua tatou faatasi ai.

Ua ou tulai atu ma lou ava ma le faaaloalo lava i lau Afioga i le Fofoga Fetalai, ona e i ai vaega ia o le Tulafono Tau Faaofi e fia fai i ai se manatu. E muamua ona ou faafetai i le Matagaluega aemaise le Afioga i le Tamaitai Minisita mo le galuega, e le o se galuega faigofie le mea o i ai nei lenei vaega mo le faiga o le palota, aemaise lava i le taimi nei, o lea e tau fai resitala. Ae momoli le faamalo i le Sui Komesina ma le mamalu o le Matagaluega, ae i ai

lava nai vaega ia e tatau pea ona faamalamalama ina ia taufai maua ai nisi auala e faafaigofie ai le galuega o lo o faatino nei.

O le vaega muamua, e muamua lau lauga agai i le Tulafono Tau Faaofi. O le vaega lea o le Tulafono Tau faaofi e faapea mai, e tolu tausaga e te tautua ai pe fai ai lau monotaga, ona e agavaa lea e te alu faasui usufono o le Palemene. E i ai lou manatu lau Afioga i le Fofoga Fetalai ma le mamalu o le Palemene, o se Tulafono ua le mafai ai ona fai le aiatatau a le tagata e alu ai i le palota. E i ai tagata foi nei le mamalu o le atunuu toe lua tausaga fai le palota ae fai le matai, tasi le tausaga ae fai le matai. O lea foi ou te vaai i le toatele o tamaitai o lo o i ai le manatu e o i le palota o lo o loma nei. E i ai lou manatu, e fai lava sina mamafa o le vaega lea o le Tulafono Tau Faaofi. O le mea o le tautua, e le fua i se tagata e toatasi, e le fua ia au seiloga ou te matai ona ou tautua lea. E tatau lava ona fua le tautua ma le monotaga i mea sa fai e lou aiga, e lou tama, o le tama o lou tama, o tagata uma ia sa tautua i totonu o le nuu po o le alaalfaga. A o le Tulafono Tau Faaofi lenei, o lea ua aumai ua faasino i le tagata e toatasi. Ua le taua la le monotaga ma le tautua na fai e matua, ua ala ai ona oo alo ma fanau aemaise le mamalu o le atunuu e avea ma sui usufono o le Palemene, a o lea ua fai lenei Tulafono Tau Faaofi. O lau vaai i le Tulafono Tau Faaofi lenei lau Afioga, e pei o se Tulafono Tau Faaofi e puipui ai nisi ia aua ne i toatele nisi e o i le palota.

Ou te tatalo atu i le Afioga i le Tamaitai Minisita aemaise lau Afioga i le Fofoga Fetalai, se i toe tagai ifo lava i le Tulafono Tau Faaofi lenei, pe aisea le mea ua ala ai ona tuu lenei vaega i totonu o le Tulafono Tau Faaofi o Faiga Palota. O lea ua ataata mai le tatou faiga palota, masalo pe toe ono i le valu nai masina, a o lea foi ua toe tuu atu lenei vaega. Ou te iloa o lea e faatusatusa le vaega lea i le tolu tausaga foi lea e malaga mai ai le tagata mai fafo e fia alu i le sui tauva. Ou te iloa o lea ua maoti lava ma taatia lenei vaega, a o le vaega lea, ou te tatalo atu ma le faaaloalo i lau Afioga i le Fofoga Fetalai e ui atu i lau Afioga i le Minisita, se i toe tagai ane o lea ua tatou faia le Tulafono Tau Faaofi ina ia mafai ai ona sao mai tamaitai i totonu o le Palemene, a o lea foi ua tatou toe faia le Tulafono Tau Faaofi e taofia ai nisi e toatele o lo o fia o e avea ma sui tauva. Atonu o lo o i ai ni tagata ua fefefe foi lea ne i te i ua omai tagata nei, aua ou te iloa o le Tulafono tau Faaofi lenei, e puipui ai tatou lea o lo o i ai i le taimi lenei. A o lea ou te fai atu, se aua le fefefe, se aua le fefefe, se ua uma ona tofi e le Atua le Palemene, aua le fefefe i le Tulafono Tau Faaofi lenei. O lea ou te tatalo atu ai, po o le a se finagalo, toe aveese lea vaega o le Tulafono Tau Faaofi.

O le vaega lona lua lau Afioga i le Fofoga Fetalai, o le vaega lea sa ou taua i le taimi sa faamalamalama ai le Tulafono Tau Faaofi lenei, o mea foi nei o defacto relationship, po o ulugalii foi nei e le i faaiipoipo a ua ova ma le lima tausaga o nonofo ma fai le aiga ua i ai foi ma fanau, pe i ai se avanoa aua e pei ona ou tau faamalamalamaina, afai o lo o i ai se vaega faapea i totonu o le alaalfaga o Faleata Sasae, a faapea la o le tama o se tagata o le alaalfaga lea o Faleata Sasae, a o le tina e sau i tua atu o isi alaalfaga, e le mafai i lalo o le Tulafono Tau Faaofi ona palota le tina lea ma lana fanau i totonu o Faleata Sasae. A o fea le mea o le a o e palota ai? Fai mai e o e palota i le mea e i ai le kinship po o le mea na i ai aiga, le mea na sau ai. Ona tatou toe foi foi lea i le mea lea tatou te taumafai e taofiofi, o le o atu o tagata o lea e nonofo i totonu o nuu nei palota i nuu i tua. Ia maitaulia foi le Tulafono Tau Faaofi lea ua i ai, o lea ua i ai lava boundaries o Faleata Sasae, Faleata Sisifo, o ai lava

la i lou iloa, o ai lava o nofo i totonu o boundaries na e ova atu i le ono masina pei ona i ai nei po o le tolu tausaga, ua i ai foi lana aia e nofo ai i totonu i i, pe e te nofo i se fanua tumaoti pe e te nofo i se fanua tau Samoa, e fai lau filifiliga, i lo lou toe filifili e te alu e te palota i le mea o lo o e nofo ai, e mafua ona e leai sau kinship. O lea ua i ai le isi vaega o le Tulafono Tau Faaofi lea e tau faamama ai le vaega lea pei ona faamalamalamaina e le Afioga i le Minisita, aemaise le vaega lea ua faapea mai, e mafai la e fanau po o le toalua ona palota pe a tusa lava pe leai sana kinship i totonu o le nuu lenei, a o lea ua fai lana palota pe afai ua maea ona resitala i totonu o le alaafaga lea. Se i tagai la i ai i lea vaega? Afai na mafai ona resitala le tagata lea i le taimi muamua, aisea le mea na mafai ai pe afai e le o se tagata i i? Aisea? Afai na mafai ona resitala, o lona uiga o le solitulafono na resitala ai. A o lea o le a toe alu atu le tatou Tulafono Tau Faaofi, o lona uiga e mafai la ona resitala ai ma lona toalua ma lana fanau ua atili ai ona solitulafono le Tulafono Tau Faaofi lenei pe afai e alu ai. A o lea la ua toe fai le mea lenei o le Tulafono Tau Faaofi, e taumafai e faasao ai le vaega lea. Ae i ai lou manatu, o la e faigofie lava le Tulafono Tau Faaofi. Afai e te nofo i Vaivase, o Vaivase o la e i totonu o le boundaries a Vaimauga Sisifo, e te palota i Vaimauga Sisifo. Pe i ai sou kinship pe leai, ua leva tausaga o e nofo i totonu, o lau residence lena, e faapea foi i Vaimoso. Mo se faataitaiga, o gauta i Sinamoga, o tagata Alafua, e leai ni matai o nuu nei. E leai ni matai i Alafua, e leai ni matai o tagata mai isi alaafaga nei e omai matai i totonu i i. O le Tulafono Tau Faaofi lea e i ai nei, e le mafai e se Alafua ona omai palota i totonu o Faleata Sasae, leaga e leai se kinship i totonu. O le mea la lena o lea e fai ai, afai o oe sa e nofo i totonu o nuu nei, o lea ua aumai boundaries o nuu i totonu o Faleata Sasae, o le a le mea e le mafai ai ona e palota a o lea e te nofo i totonu i i, o lea ua aumai le Tulafono o oe e tatau ona e palota i i? Na pau le mea, ia fai se tuutuuga pe fia tausaga e tatau ai ona e nofo i totonu i i. O le mea lea e tupu lau Afioga i le Fofoga Fetalai, toetiiti lava uma tagata o itumalo nei ona liliu, ona ua faigofie le Tulafono lea o le urban seat. Aua o le urban seat, vaeatu foi sui faatutu, o le faigofie ia, na ona i ai lava o lou fanua tumaoti, ua mafai ona e liliu, o fea lava le mea e leai lava ma se isi mea e i ai. O le mea la lea ua tupu nei, e toe laga atu i tagata ia e nonofo i totonu i i, ua uma ona transfer. Ae tatau ona tagai ane lau Afioga i le Minisita, aemaise lava nuu nei e i ai urban seat, afai o i ai i totonu o le lola lea, e tatau ona fuafua i ai pe tatau ona transfer pe leai, tagata ia e i totonu o lola nei faamolemole lau Afioga.

O le vaega lona tolu lau Afioga ou te fia tautala i le vaega lea, ou te faafetai i lau Afioga i le Sui Komesina faapea lau Afioga i le Minisita, le vaega lea ua toe fai o le puega o le ata. Faafetai mo le tofamamao ma le utaga, o lea ua faataatia ai le vaega lea, lea ua tuu atu i luga i le 15 tausaga, pei foi ona saunoa le Afioga i le Sui Komesina, e le na o le ata e mafai ai ona e palota, a foi lea e te alu atu fai lau finger print, avatu lou pepa fanau, avatu uma ou Ids nei. E le mafai la ona taofia e le ata le mea o le a ala ai ona e le palota. O lea e faafofoga mai le mamalu o le atunuu, faafetai i le Matagaluega ua toe ae se tofa ua faatino le vaega lea o le Tulafono Tau Faaofi e mafai ai ona faatino le vaega lea.

O le vaega mulimuli, masalo o se vaega sa taua soo lava e se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi, e tatau ona faaleo atu lau Afioga i le Minisita, o le vaega lea o le lē mafai e

lota toalua ona palota ia ita pe afai o au lea ou te fia alu ona e matai i le isi nuu. E pei lava ona saunoa le tele o sui usufono, se i tagai ane i le vaega lea lau Afioga i le Minisita. Aua afai nei o au e matai lou toalua i Lefaga, a faapea e matai ai i ina, o lona uiga e le mafai ona palota ia au, a o si ou toalua lea o lea e tigaina i le faiga o le palota, o le tagata lea ua uma ona ma faaipoipo e aupito sili ona pipii le sootaga, a o lea e fai mai le Tulafono Tau Faaofi e le mafai.

Lau Afioga i le Sui Komesina aemaise o le Minisita, se i tagai ane faamolemole semeamanu o lea e lava le taimi o le tatou faiga palota. Ia, na pau ia o nai motugaafa i lau Afioga i le Fofoga Fetalai, aemaise e faamalulu atu foi i lau Afioga i le Minisita ma le mamalu o le Matagaluega, ona pau lava o nai motugaafa aua le alualu i luma o le tatou galuega. Manuia lenei aso.

FOFOGA FETALAI: Ia, e manatu ona pau lea o sui usufono na fia saunoa. Ia faasolo mai uma i o, le sui usufono mo Faleata Sisifo, faasolo mai i ina ona faamuli mai lea i le Afioga i le Sui Taitai o le Itu Agai.

Ia, tulai maia lau Afioga i le sui usufono mamalu mo Faleata Sisifo.

Tofa LEALAILEPULE RIMONI AIAFI (Faleata Sisifo): E faatalofa i lenei taeao i lau Afioga i le Fofoga Fetalai ma le paia o le Maota o Samoa i le Afioga i le Palemia ma lona Itu, aemaise foi o lenei Vaega i sui usufono o le Palemene, ma i latou ua mafai ona tatou afaatasi i lenei taeao, aemaise foi o le faafofogaaga a Samoa. Malo le tapuai, malo le soifua, faafetai foi i le Atua i Lona agalelei tumau ia Samoa.

Ae ou te talitonu, o le taimi lenei i totonu o le atunuu lenei ma totonu o le Palemene, e leai se mea o toe alu tele i ai se mafaufau o se sui usufono, e pau lava le mea lea ua i ai le malosi o le sui usufono lea e i totonu o le Palemene, e faapefea ona toe malo mai i le palota, e le gata ia tatou i totonu o le Palemene, a o le au fia faipule la e feoai i tua, o la e feoai solo foi latou i tua, e fai mea e fia malo e fia omai uma lava tagata i le Palemene, o lea la e galulue tatou i i, o la e fai lesitala a isi sui, ia e malo ai i le palota. Ia e le o se mea e taofia o le aiatatau lava a le tagata. O lea la ua aumai le Tulafono, faafetai i le Afioga i le Minisita ma le Matagaluega. O le mea e tatau ona ave i ai le faamuamua a le Palemene lenei pe a toe omai i le isi faiga palota, ia tagai lelei i le tatou Tulafono lenei, sa tupu foi le mea lea muamua, o le oo mai lava o le a fai le palota, ae ta sui, ta sui, ta sui, ta sui, ua matua confuse tagata palota, e le gata i tagata palota, a o sui usufono, ua matua le mautonu i le sui soo o le tatou Tulafono lenei. O lea o le a oo mai le palota, o lea o le a tapuni nei le lesitala i le faaiuga o Oketopa i le amataga o Novema, o lea ua toe lua i le tolu masina, a o lea foi ua toe aumai lenei suiga fou i mea o lesitala. O lou talitonuga lau Afioga pei ona talanoaina i le tatou Komiti foi lea o Galuega, e le tatau ona toe fai ni Komisi Suesue, faaoga Komiti a le Palemene, o la foi e fai i Ausetalia, Niu Sila ma isi atunuu, o latou tonu nei o la e i ai le malamalama i le faiga o mea e fetuutuunai ma le latou silafia ma le iloa e fesoasoani i le faiga o le tatou Tulafono lenei, o tatou nei o lea e malamalama lelei i ai, fai mai nisi, e le o se independent, ae a fai le Komisi Suesue nei, ia e alofa i nai sui usufono i maumau le o ae le malo mai i se palota.

FOFOGA FETALAI: Ia malie le sui usufono, se i avatu le avanoa i le faauilavea a le Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o le isi lea Tulafono atonu o le mea e tatau ona fai, faafetai i le Tamaitai Minisita, ona o le mataala e toe fai Teuteuga, aua o lea e tele le taimi, ae a matau i a tatou Fonotaga ua uma, o isi lava ia mea sa tatui i totonu o le Maota lenei, o le talosaga mai se i toe tilotilo mai i mea ia o ata, pe le tatau ona toe fai i ai se isi faiga, talosaga mai i mea ia se i toe vaai i tulaga ia ua le mafai ai ona lesitala isi ona o le Tulafono. O lea la ua.....aua e leai lava se isi mea e fai i le Minisita, e na o le pau lava le mea, o le toe teuteu le Tulafono. O le taeao la lenei, sa ou faapea e na o le tu mai lava o lea, e taua mea ia ua aumai, o lea ua aliali mai ai i i, ia le agaga fesoasoani o le Tamaitai Minisita e fai mea ia sa matou tatalo atu ai.

Ia lau Afioga i le Fofoga Fetalai, pei o mea na o lea o le a tauau ina nunu le toau i le faafogafoga mai a le atunuu, a o mea ia sa lagalaga mai i totonu o tatou Fonotaga talu ai sa talanoaina ai ia Faiga Palota. O le mea e sili ona taua, o le amanaia, amanaia, o le aumai o fautuaga amanaia e le Malo aemaise le Minisita e fitoitonu i ai ia atugaluga sa aumai. O lea la ua tali le Malo, se i vaai i le vave, o lea e le i umi atu ai le tatou Fonotaga talu ai ae toe...o lea ua toe tali mai e toe aumai e toe teuteu. O mea ia sa tatalo mai ai ia a outou Afioga, a o lea foi la ua fai, a o lea foi ua fai mai ua confuse, ua le mautonu. O le a le mea na outou tatalo mai ai? O le mea la lea, se tuu ia lo outou faitio, ae tu mai ma faapea mai, faamalo i lau Afioga i le Tamaitai Minisita i le tofamamao ma lou tali valaau. Ia o lea ua outou valaau, valaau mai e fai ia Teuteuga o lea ua tali le Minisita, a o lea foi ua toe faitio.

Lau Afioga i le Fofoga Fetalai, na o se faamanatu mo isi o lo o sauni mai.

Tofa Levaopolo Talatonu (Gagaemauga Nu. 2): Lau Afioga i le Fofoga Fetalai.....

FOFOGA FETALAI: O sau folasaga?

Tofa Levaopolo Talatonu: Leai na o se mea e fia malamalama i le saunoaga a le sui usufono mamalu.

FOFOGA FETALAI: Tulai mai le sui usufono mamalu.

Tofa Levaopolo Talatonu: Po o manatua e le sui usufono mamalu na i ai se isi o le itu lenei na talosaga i se talosaga faapea lea e saunoa i ai le Afioga i le Palemia. E leai lava ma se isi o matou na talosaga, a o latou lava na fai lava a latou talosaga i tua ma omai aumai.

Tofa LEALAILEPULE RIMONI AIAFI: Lau Afioga i le.....

FOFOGA FETALAI: Malie lava lau Afioga i le sui usufono mamalu, se i tuu atu le avanoa i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o le isi la lea mea ou te faasaoa,

a uma a outou saunoaga, ou te toe alu toe faitau uma lava a outou lauga, e toe faitau uma lava a outou lauga ia aua ne i galo ia te au mea sa outou saunoa mai i ai, ae tatau foi ona outou faia le mea lena ma le galo soo ia te outou na mea.

Afioga Hon Palusalue Faapo II (Taitai o le Itu Agai): Lau Afioga o se mea e fia faamalamalama.

FOFOGA FETALAI: Ia tulai mai lau Afioga i le Taitai o le Itu Agai.

Afioga Hon Palusalue Faapo II: Leai e le soona tutulai ma saunoa le itu lenei, e ala ona saunoa le itu lenei, aemaise lava pe a oo i le aiatatau a tagata lea e puipuia e tagata, le aiatatau lea ua taofia ai nai tagata e le mafai ona e alu e avea oe ma sui faatu pe a e le tautua i le tolu tausaga. O le mea lena o lea e lauga atu ai o le aiatatau, o le aiatatau a nai sui faatutu, a o lea ua taofi e le HRPP, a le tolu tausaga, e le mafai ona e tauva i le faiga palota.

FOFOGA FETALAI: O lea ua maua lou finagalo. Tulai mai le sui usufono.

Tofa LEALAILEPULE RIMONI AIAFI: Lau Afioga i le Fofoga Fetalai.....

FOFOGA FETALAI: Ia malie lava le sui usufono, se i avatu lava le avanoa i le Afioga i le Minisita mo Tina ma Tamaitai, Atinae o Nuu, Afioga ma Agafesootai.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu, Afioga ma Agafesootai): Faamalo faafetai i lau Afioga i le Fofoga Fetalai, le paia foi o lenei Maota ma le faafogafoga a le tatou atunuu. O lea ua ou faalogologo atu i le atugaluga a le Afioga i le Taitai o le Itu Agai, e leai, o le Taitai foi ou te fautua lava i ai. O lea e tau mai, o le matua le amanaia lava e le Taitai o le Itu Agai le tautua a le tagata i totonu o le nuu ma le itumalo, o lona uiga, e matua musu lava i le vaega lea, o le matua musu lava i le vaega lea, o le faataua o le aganuu a Samoa, ioe. Afai na ona e sau e nofo i totonu i le tolu tausaga ae leai se tautua e fai, o le a le aoga? E matua leai se aoga. O lona uiga e tatau ona e taamilomilo i Apia ae faamoemoe e te alu e te sau i le palota. A o mea ia e taumafai atu ai le HRPP, o mea e talafeagai ma le soifuaga ma tu ma aga a Samoa, o le mea foi lena o la e tautala i ai le Tusi Paia, “ia e faia mea e finagalo i ai faipule.” Ma le isi itu taua o la e fai mai Paulo, e tupu le faatuatua o galuega. Ia a o lea e matua musu lava le Taitai o le Itu Agai i le mea o le tautua i totonu o afioaga ma alaafaga, a o lea e taumafai atu le HRPP ia silasila le atunuu, e taua le mea lena, sau e nofo ma fai le tautua i le nuu.

Ma le faaaloalo lau Afioga.

Afioga Hon Palusalue Faapo II: Lau Afioga i le Fofoga Fetalai o se mea e fia faasao.

FOFOGA FETALAI: Ia malie ia....

Afioga Hon Palusalue Faapo II: Leai e puupuu lava.

FOFOGA FETALAI: Ia faapuupuu mai la.

Afioga Hon Palusalue Faapo II: Ia o lea o le a faapuupuu atu. O tatou e i ai o tatou aiga i nuu, e tatou te tautua agai i ai. E te fiu lava la e oso i i oso i i, o la e fai tautua a aiga o lea e tautua i ai sui. A o lea na outou finau nei e teuteu le Faavae ina ia tele sui tamaitai e o i le palota. A o le a le mea lea ua fai nei? Ua taofia i i le tele o sui tamaitai e tauva i le palota, ona o le Teuteuga lea ua aumai nei.

FOFOGA FETALAI: Ia o lea ua maua lou finagalo, ne i toso ese le tatou Fono, se i oo i lou taimi, ia ona ou avatua lea o le avanoa ona agai mai foi lea o le Malo e tali mai.

Tulai mai lau Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai leaga o lea e taua le itu lea. O le tulaga i le tautua e le o se...O lea faatoa fai nei i le mea lea, o lea faatoa fai nei i le Tulafono lea, ua leva lava ona i ai le tautua i totonu o tatou Tulafono. O le mea foi e faapea o le tautua a le tama, o le tautua a le tausoga, o le tofi faipule lea e tatou te talanoa i ai, e fitoitonu lava i le tagata e toatasi. E le o se tofi o oe ma lou tama, ma lou uso ma lo outou aiga atoa, e leai, o le tofi e fitoitonu lava i le tagata e toatasi lea e tautala i ai le Tulafono. Aua la le aumai fua isi gaogaosa e le taua i le Tulafono. O le agaga o le Tulafono, ia faamanino ma faamaoti ina ia atoa le filifiliga e sau le tagata i totonu, o le tagata e aoga mo lona itumalo, e iloa le igoa o le tautua, e le o se tautua faatoa fai nei, a o le tautua ua leva lava ona fai i totonu o le nuu.

Lau Afioga i le Fofoga Fetalai, pei o nai mea na o lea e tau faamanino atu, ona o lea e fesisiasiai solo mai ia saunoaga a sui usufono i le faamaninoga o le tautua, o le upu tautua.

Afioga Hon Fiamē Naomi Mataafa: Lau Afioga i le Fofoga Fetalai ou te faasaoina le taimi o le Afioga i le sui usufono.

FOFOGA FETALAI: Tulai mai lau Afioga i le Minisita mo Faamasinoga ma Pulega Tau Faamasinoga.

Afioga Hon Fiamē Naomi Mataafa: O se mataupu e fia faamalamalama ae le i tea ese atu. O lea sa saunoa mai, ina ia le toe faia ni Komisi Suesue pe a maea palota, ae tuuina mai i se Komiti a le Palemene.

Lau Afioga i le Fofoga Fetalai, o Komisi Suesue o lea e tatou te malamalama uma i ai, e i ai malosiaga faale-Tulafono o lo o i ai e tauaveina ai nei tiute. Ma o lea sa saunoa i ai le sui usufono i le vaaiga o la e lote e nisi i tua atu o le lio lenei o tatou o sui usufono, ma e taua tele lenei itu – ma ou te fia faamanatu atu i le sui usufono, i le Komiti lea e i ai le sui usufono e Taitaifono ai lau Afioga i le Fofoga Fetalai, o lea foi na avatu i ai le tatou Tulafono muamua o le Teuteuga foi o le tatou Tulafono lea o Faiga Palota, i totonu o le Tulafono o le Standing Orders lea, o la e o lo o i ai le matafaioi i le Komiti lea na te toe iloiloaina ai Review le Tulafono o le Faiga Palota. O

lona uiga, o lena o lo o i ai ia avanoa e fai ai le sao o le lio o le sui usufono e faasino i le Tulafono lenei – ma e fai ma molimau lau Afioga i le Fofoga Fetalai lea na fai mai le Lipoti a le Komiti a lau Afioga, o lea o lo o i ai le Afioga i le sui usufono o lo o saunoa nei, na aumai ai a outou fautuaga i mataupu o le Tulafono e ao ona suiina, ia na tatou auala lava lea i auala masani e tuuina atu le Lipoti lea a le Komiti o le Maota ma tuuina atu i le Malo, ia ma faapea ona tali mai foi le Malo, ia o lo o taatia i luga o le tatou Laulau a Fono le Tali a le Malo i le Lipoti a le Komiti e faasino i le iloiloga o le Tulafono o Faiga Palota, faafetai.

FOFOGA FETALAI: Ia tulai mai le sui usufono mamalu e faaauau le saunoaga.

Tofa LEALAILPULE RIMONI AIAFI: Faafetai i lau Afioga. Lau Afioga i le Fofoga Fetalai, i le faauilavea a le Afioga i le Palemia, se o lau lauga e fai kia, o lea faatoa tau amata ona faaoso lau lauga e le i oo i le taimi ou te faafetai ai. Ia o lea la lau Afioga, ou te faamalulu atu, e pele tele ia matou le upu o le tautua, leaga ai ona o le igoa o le pati o le Tautua. O le mea lea e faamanatu atu i lau Afioga i le Taitai o le tatou vaega, ne i galo ia tatou o le tautua o le mea taua. Ia a o le mea e lelei ai, o le tautua o le service ae le o le monotaga. Ia te au ia, o la ua open le mea, o la ua open le mea, po o ai e fia alu i le palota, tatala le avanoa, omai tatou te o i le....ae aua ne i i ai ni pa puipui mo tatou tagata, o le mea lea o lea e taumafai atu ai lenei itu. O lea e tatou te vaai i le Televisi i po uma lava, e ki loa lau TV, faafetai lava i le Komesina o Faiga Palota i le latou feau ia e aumai, o le mea lea e faamuamua i feau ia, o le aiatatau, aiatatau. O le mea lena e tataua ona atagia i i le Palemene le tulaga lea e saunoa ai.

Lau Afioga i le Tamaitai Minisita pei ona ou talanoa atu, e le faatoa fai lea o se Komisi Suesue i mea ia o palota, uma le palota fai, uma le palota fai. Ou te le o iloa po o le a tonu lava se mea tele o tupu mai ai, aua foi o lea e aumai toe repeat e tatou le process, e toe fai atoa lava e tatou le process, ona fai lea o le mea o lea e tatou te talitonu e lelei ma fautua i le Palemene. O le ala lea o lou fautua atu, o le a la le mea e saga moomia ai fua le Komisi Suesue lea, o le a le mea e saga moomia ai fua? Afai o la e faatino e Ausetalia faatino i Niu Sila pei ona tutusa ana Faigamalo, ia e mafai foi la ona fai i inei, e tataua foi la ona fai i inei, aua o lea ou te fai atu, o le mea lea o le atagia o le tutoatasi, ia o lea e tatou te iloa uma lava, pe na o le Taitaifono lava ma se isi e le i i ai i se palota a o sui uma o le Komisi na o i le palota, faiaina, ia ou te le fai atu nisi tala e sosoo atu.

Ia lau Afioga ona faasolo mai lea i le tatou Tulafono, e le toe fai atua se upu i le tautua o le mea e tataua ona tilotilo i ai le Palemene ina ia aua ne i taofiofia o tatou tagata, ae a oo loa la ina faauiga ma define le mea e tau o le tautua, e mafai foi ona e tautua oe i lou aiga ma lou nuu ma lau ekalesia, o le tautua lava lena o lena e te faia i totonu o le nuu ma le itumalo, afai la e tautuaina le sui lea e o i le urban aua e leai ni nuu, toe foi. O le mea e tataua ona tilotilo i ai, tasi le Tulafono mo tatou uma.

Ona ou oo mai lea i le suiga o talosaga, faafetai o lea ua atagia tutusa le talosaga o le mafai ona avea oe ma sui tauva ia ma aveese mai i lou tofi. E pau le mea sa tataua ona faamamafa i le vaega lea o le Tulafono, o ni ituaiga soligatulafono le nature o le crime, aua e le tataua ona tatou.....pe e i ai

Tulafono pe na o le tausaga pe le atoa se tausaga na falepuipui ai, e le tatau ona agavaa i se sui faipule, e tatau la ona tilotilo i le maximum penalty o le faasalaga, afai o le faasalaga lea e commit e fitu tausaga e tatau ona falepuipui ai a o lea e tuu i ai le tolu pe lua tausaga, e le tatau la ona tilotilo i le lua tausaga lea e tatau ona tilotilo i le maximum penalty o le faasalaga, o i ina e atagia mai ai le mamafa o le soligatulafono ma e le tatau ona talia E tatau ona toe tagai lelei i ai, aemaise lava i le ituaiga soligatulafono e tatau ona tagai i ai.

Faafetai i lau Afioga i le Tamaitai Minisita ma le Matagaluega i le puega o ata. E sao le Afioga i le Palemia, o le mea lea sa faamamafa e le toatele o sui usufono, aemaise foi le agaga faafetai o lea ua aumai le aiatatau. I lou lava vaivaiga na o au, lau Afioga i le Komesina o Faiga Palota ma le Matagaluega, e leai se sui usufono o lo o faia sana resitala i le taimi lenei e le o feagai ma faafitauli i le faigata o le faiga o resitala. O le upu tonu lava lea ua aumai i le vaega lea o le Tulafono Tau Faaofi, o le upu lea e tatau ona faamamafa ia te outou ma le Matagaluega, leaga o mea ia sa fai talu ai. O le palota talu ai ma lou faaaloalo lava, e leai se sui usufono e aupito sili atu ona tele ana tagata resitala pei o au, ou te malamalama lelei i le faiga o mea nei, o le mea lea o le aia, le discretionary power, o le aiatatau a le Matagaluega e fetuutuunai ai e faaoga le mafaufau, le logical common sense i mea e tatau ona fai. Ona o le tele o nai sui usufono o lo o i ai nei, vaeane le Matagaluega, o le latou palota muamua lenei, a o sui usufono tuai sa i ai, ua lua, tolu faiga palota o i ai, e malamalama latou i le fetuutuunaiga o le Tulafono, ina ia aua ne i tamauina le Tulafono, ae fetuutuunai, e i ai feasibility e fai ai mea nei. Leaga foi o le pepa fanau, o se pepa ua aumai e le Malo e taua ma e tele lona taua. Afai e le faamamafaina le taua o le pepa fanau lea e i ai nei, e le o se pepa a matou, o le pepa a le Malo. O le uiga o lau faamatalaga, sa ou fesiligia muamua le Matagaluega, afai ua tele suiga o mea nei ona sa i ai ni soligatulafono, ona tau mai lea pe fia, po o le a le pasene, aua e tatau ona tatou iloa, o le suiga, e le mafai ona tatou faia se mea e aunoa ma se faafitauli. Ae le faapea o le a avea ni tagata se toalua po o se toatolu e solitulafono e afaina uma ai tatou uma nei e faia le amiotonu i le taumafaiga o resitala nei. Ae faafetai o lea ua aumai le vaega lea o le puega o ata.

I lou talitonuga lava na o au, sa tatau ona taatia faapea na o tagata e 65 tausaga agai i luga e toe pue o latou ata, aua o le taimi lena ua i ai tau i ai se suiga. A o tatou ia, ia ua faafia ona tatou masani ua tai fasefulu i le tai limasefulu tausaga o tatou feola, o foliga lava ia e tasi? Ia ma le faaaloalo lava.

Ona ou oo mai lea i le mea lea e faapitoa i itumalo nei o Faleata ma Vaimauga. O le mea tonu lava lea lau Afioga o lea ou te talanoa i ai, i le tele o le confusion lea e i ai nei...

FOFOGA FETALAI: Malie le sui usufono mamalu se i avatu le avanoa muamua i le Minisita mo Fesootaiga ma Faamatalaga Tekonolosi ona avatu ai lea i le Minisita Lagolago.

Afioga Hon Tuisugaletaua Sofara Aveau (Minisita mo Fesootaiga ma Faamatalaga Tekonolosi): Lau Afioga i le Fofoga Fetalai, se i fai se malologa a le sui usufono mamalu. E pei o le mea lea ou te tau popole atu ai i

le vaega lea o le toe pue o le ata, o tagata foi nei sa i ai lauulu muamua, a o lea ua leai se lauulu i lenei taimi.

Tofa LEALAILEPULE RIMONI AFIIFI: Faafetai lava i lau Afioga...

FOFOGA FETALAI: Maualaivao, e i ai se mea e fia saunoa ai?

Afioga Maualaivao Pat Ah Him (Palota Taitoatasi): Lau Afioga i le Fofoga Fetalai, faafetai mo le avanoa. Faamalo faafetai i le tatou Fono, ua aofaga potopoto foi i le agalelei o le Atua. E leai ou te le o faitio i le saunoaga a le sui usufono mamalu. E pau lava si mea i lau faalogo pe moni, o le upu lea e faaleiloa e sui usufono fou nei faatoa taitasi... le faigata ma le ogaoga o le mea o le resitalaina o tagata palota. Lau Afioga i le sui usufono mamalu, e leai, e tutusa lava le tausaga e tasi ma aso e afe i le agaga lea. E faamalulu atu ai, e le o se faaleaga i lau saunoaga, ae aua le faaitiitia i lau silasila le talafeagai nai sui usufono fou nei e i ai matou, a o lea lava matou te taumafai tatou te galulue faatasi. Ma le faaaloalo.

Tofa LEALAILEPULE RIMONI AIAFI: Ia, ou te iloa e le o faafofoga lelei le sui usufono mo le Au Palota Taitoatasi. Ou te le o talanoa atu i le sui usufono mo le Au Palota Taitoatasi, o lea ou te talanoa atu i le Matagaluega. Ae e le afaina, o le sui usufono lea, e popole tele lona loto i le palota. Aua e te popole lau Afioga, fai fiafia lau palota. O le mea lea ou te talanoa atu ai...

Afioga Maualaivao Pat Ah Him: Lau Afioga i le Fofoga Fetalai, se e faamalulu atu i le tatou Maota, e leai, e le o lou tu atu o se faaalua o sou popole, o le taumafai ina ia faasao lau saunoaga pei e le fetui i lata faalogo. Ma lou faaaloalo lau Afioga i le Fofoga Fetalai.

Tofa LEALAILEPULE RIMONI AIAFI: Lau Afioga i le Fofoga Fetalai, ou te le o malamalama po o le a le mea lea e fia faasao e le sui usufono. Ae ui i lea, e leai ou te le toe... o le mea lea i le tausaga e tasi ma aso e afe lea e saunoa ai, e leai o le aso e tasi e le o le tausaga e tasi. Vaai la i le sese o le... Ae o le a le afaina.

O le mea la lea e patino i lenei itumalo. Faafetai i le Tamaitai Minisita ma le Matagaluega, e le natia, na matou o lava ma nisi o sui usufono i le Afioga i le Palemia, e toe silasila i le mataupu lea. O le mea lea e i ai nei, ua matua tele tele lava le faaletonu o le faiga palota lea e i ai nei. Sa matou o foi ma nisi i le afioga i le Sui Komesina o i ai nei i le tulaga lea ua aumai ai nei suiga le suiga ua i ai nei. Faafetai o lea ua aumai, afai o tagata o lea e i totonu o le lola a matua, e mafai lava ona o tagata i totonu. A faapefea la matua aua o isi taimi, ua leva ona i ai nai fanau, ae o matua sa o e palota i tua i o latou aiga. O lea la ua toe fia omai matua.

O le uiga la o lau faamatalaga pei ona ou fai atu i le amataga, ia tasi le Tulafono mo tagata uma, e tataua ona toe tatala le Tulafono mo nuu nei i le Vaimauga ma Faleata, filifili le tagata i lana aiatatau po o fea e palota ai. O le mafuaaga, o sui usufono nei, na ona tau fua o sui usufono o le urban, a o sui usufono mo Faleata Sasae. E tusa o le Tulafono Tau Faaofi lea ua i ai nei, tusa ua tolu sui usufono o Faleata Sasae ae fa sui usufono o Vaimauga. Leaga o tagata uma lava o lea e i totonu o le itumalo, o le mea lea sa avatu ai foi lau

talosaga i le taimi a o faagasolo le Tulafono Tau Faaofi, afai o lea, taofi la le resitalaga se i pasi lelei le Tulafono Tau Faaofi. Aua foi o lea na resitala mai lava tagata Falelauniu mo se faataitaiga o Siusega, Ululoloa, sa resitala mai lava i lalo o le TC mo Faleata Sisifo, e tau mai lava ia Me o le tausaga lenei. Na pasi loa le tatou suiga lea na i ai nei, taofi loa. O lea la ua confuse tagata, ua le iloa, o le a la le mea ua toe taofi ai, a o lea sa faataga ou aiga, o ou uso ma tagata ia e i autafa o lou nuu? A o lea ua.....

O le isi mea, o au o le sui usufono o le TC i le taimi lenei, e aofia ai Falelauniu ma nuu uma i uta i le finauina o le mea la e fai o la e iloa e itumalo. A o lea ua te i ua faaletonu faapenei ma tulaga lea e i ai nei. Ua ou oo i le Ofisa o le Komesina ou fai atu, afai la o le tou talitonuga o tagata nei e urban lea ua resitala i totonu o lola nei, e tatau la ona transfer otometi lava pei o le mea lea na fai i le individual, transfer otometi lava i le Lola a le Urban Seat pe afai o lea ua outou saunoa mai. Ae saunoa mai le Ofisa, o le aiatatau a le tagata, e le mafai ona transfer, o le aiatatau a le tagata e toe aluese ai. Lelei. O lea la ua alu atu le tagata o lea e nofo i Vaitele e fia palota lava i le TC, ae fai mai, e leai, e le mafai leaga e tatau ona e palota i le freehold lena e te i ai. O ai la e faaoga le aiatatau a o ai e deny le aiatatau? O le mea lena na ou fai atu ai e fetuutuunai. O lea e saunoa le Afioga i le Minisita mo Tina ma Tamaitai, o le tatou mea lea e fai atoa, o le aganuu, aua e gagau le aupolapola i totonu o le nuu ona mafai lea ona gagau le aupolapola a nai tagata nei, lolotu faatasi i le lotu e tasi. O a mea a le community_e fai, e faifaatasi, ae a oo ina fai le palota, e leai e le mafai ona e palota i i, e te alu e te palota i uta i o. O fea la e i ai le mea lea e i ai nei? O le mea lena e tatau ona fetuutuunai, pe tutusa le Tulafono Tau Faaofi mo tagata uma aua afai o la e i ai lau freehold i Saleimoa vaeane le paia o le Maota, ou te palota lava i Saleimoa. O lau filifiliga lea. O le mea foi lena na sau ai Faleata ma Vaimauga. O le mea e nofo ai le tagata, e filifili ia, pe palota i le mea e nofo ai, pe palota i le mea e matai ai ma le aiga, e faapena. Ma o tagata foi nei le mamalu o le atunuu lea e nonofo i uta i fanua nei, o lea e i ai le saolotoga. O le tele o le mamalu o sui usufono, o lea e i ai a latou tagata palota i totonu i i. O lona uiga, o le aiatatau lena a tagata. E le tamauina. Ma o le tala lea e faapea mai ua omai tagata ese filifili le sui usufono mo Vaimauga ma Faleata, e sese lena tala. O lea la faatoa sao i le taimi lenei. Aisea? O lea o le a tele ina omai nonofo i i, toe palota lava latou o tagata fai mai i i, a o le mea sa i ai, po o fea lava e afifio mai ai ma nonofo ai, o latou o tagata Faleata, filifili e latou tagata o le itumalo e avea ma sui usufono o le itumalo, o la e filifili tagata o le itumalo. Ma e le faapea o fia palota tagata mo se Vaega Faaupufai po o ai, e palota mo le tagata. Aua o la e fefefe faapea, e malo lava le sui usufono mo Faleata Sisifo e toatele Vaitele. E le valea tagata. Ana o se Lealailepule leaga e le fia palota se isi i ai. Oi a le fia palota i ai tagata e le gata ina aulelei toe lelei? O le mea lena lea ou te fai atu ai.

O le uiga o le faamatalaga, e au lava tagata uma i le aia a le tagata, leaga o Vaitele ma lou faaaloalo lava, o le nuu mavae. O lea o le a outou tilotilo lava i ai i le logically o le mea, o au o le sui usufono o le itumalo, o lea ou te nofo i luga o le freehold, e i ai lou matai i Vaitele, ae leai sou fanua faaleaganuu. E faapefea la ona tupu lenei mea? E lelei le faiga lena i nai nuu i uta i Falelauniu aua e leai ni nuu mavae e le manino, a o nuu lava ia i tai, e amata atu i Lepea, Vaimoso ma nuu faapena, e tatau ona ave le aiatatau i nai tagata na.

A o le isi mea lea i faafitauli ia e tulai mai i komiti ae le o sui usufono, o lea e o komiti i uta, faasa nei outou palota ia Lealailepule, ia outou palota i le tagata i lalo o le urban. E pei e le fetau lina mea. Ia e le aoga foi ona taofi o tagata o la e fai le latou galuega, e fia malo uma lava tagata. Ae faaoga e tagata mea nei o le Tulafono e fai ai mea ia. A o latou mea na e fai e o atu asu le asuemu.....

Afioga Maualaivao Pat Ah Him: Lau Afioga i le Fofoga Fetalai.....

FOFOGA FETALAI: Se i tuu atu le avanoa i se tasi o sui usufono mo Palota Taitoatasi, Afioga Maualaivao Pat Ah Him. Tulai mai le sui usufono mo le Palota Taitoatasi.

Afioga Maualaivao Pat Ah Him: Faafetai. Ou te tulai atu ma le faaaloalo tele, a faapea e le fetau lau tu atu ona faasao mai pea lea e lau Afioga i le Fofoga Fetalai. Ae ona o lau faalogologo i le lauga a le sui usufono mamalu mo Faleata Sisifo, e pei o se tagi talatala ou te le malamalama tele i ai, ae ona o lea ua saunoa i nuu ia o Vaitele ma tulaga ia o itumalo, ou te talitonu o lea foi ua taua komiti....

I le taimi lenei mo le faasaoina o le taimi, e tasi lava lau... ona o lea ou te aafia i totonu o au o le sui usufono o nuu tu taulaga i sisifo. O le Tulafono lea ou te iloa, o lo o i ai le aiatatau a tagata e filifili ai latou i o latou lagona pe fia palota i mea o lo o matai ai, po o itumalo o nuu tu taulaga. E le o faapea o tamauina, po o... ne i te i ua ou sese. O lona uiga la a faapea e faaletonu, o lona uiga e sese le matou talaiga lea e i ai.

Ma le faaaloalo lava i le faafofogaaga a le Maota.

FOFOGA FETALAI: Malo. O le a avatu le avanoa e saunoa ai le sui usufono pe a oo i le taimi e te fia saunoa ai. Toe lua ou minute le sui usufono mo Faleata Sisifo.

Tofa LEALAILEPULE RIMONI AIAFI: Faafetai lava Mauala. Ia o lea lava ua saunoa i ai Maualaivao aua o ana komiti lea e faia mea nei. Ae le afaina... O le faafetai foi i le tatou Fono, o lea ua malamalama ai le sui usufono. E le o toe faatagaina le mea o le resident i totonu o Faleata ma Vaimauga, o la e faataga i tua, ae o totonu i i, e le o toe faatagaina le resident, se i vagana o la e faaoga lou matai i le mea o e matai ai ma faaoga la i le urban, ae le mafai ona faaoga i tai i nuu mavae. A o le mea lea, o le mea na sau ai i le amataga.

O le mea la lina o lea e tatalo atu ai, e foia uma lava nei faafitauli i le toe fai o le mea lea, toe tatala, toe fai le Tulafono masani na tatou omai ai, filifili le tagata ia i le mea e fia palota ai ia, ua confuse ma le malamalama tagata.

O le isi mea lau Afioga, o le mea lea o le transfer, ua toatele nai sui usufono ia na o atu fai le resitala fou, ae fai mai ua toe liliu i le urban i le isi aso e sosoo ai ona o la e faataga i lalo o le latou Tulafono. E tatau ona taofi le mea lea lau Afioga, e tutusa uma le Tulafono mo tagata uma e lima tausaga. E le lelei lea mea, aua o le mea lea na tatou taofia ai i le amataga. O le mea lea na ala ai ona tatou taofia le mea lea o le transfer e tuu i le lima tausaga, ina ia foia le faafitauli lea. O lea la ua tupu mai nei i Faleata ma Vaimauga. E resitala nei i le traditional nei ae liliu e le urban taeao. E tatau ona toe

tagatagai i ai lau Afioga i le Tamaitai Minisita ma lau Matagaluega, toe taofi le mea lea.

Faafetai i le mea lea i a outou polokalame i leitio ma televise, ae ou te fesoasoani atu i le polokalame lea e fai i taeao i le FM, lau Afioga i le Sui Komesina, se i toe tagai ifo i ai o lena e tele lava le faaletonu pe a talanoa au sui i mea ia o sui usufono mo Vaimauga ma Faleata. O nei i le taeao mo se faataitaiga; na saunoa mai le alii lea o le Matagaluega sa i ai, o le Tulafono Tau Faaofi lena, ia filifili ai lava e tagata Faleata ma Vaimauga o latou lava sui usufono, aua le toe filifilia e tagata mai i ma o. O le matua sese lava o lena mea lau Afioga.

O le isi mea, o lea ua saunoa mai, o tagata e nonofo i freehold land, e le mafai ona toe palota i tai i le traditional. Ae faapefea a outou saunoaga na fai mai o tagata la e i luga o le lola e i ai lana filifiliga pe alu ese pe nofomau. O lea ua le mautonu tagata pe o ese ma le lola pe nonofo ai pea i totonu. E le mafai ona taua mai e nai sui ia.

O le mea lea, o lau fautuaga i lau Afioga i le Sui Komesina, se i toe fautuaga ane i au tagata ia e faia polokalame nei. Aua o le mea foi lea e tupu, e feeseeseai, a ta alu atu i lea senior officer e ese lana tala, a ta alu atu i lea e ese lana tala, se i alofofa, se i tau fai ma le alofa i nai tagata o lo o faia resitala. O le galuega a outou, ia resitala tagata o le tele o Samoa, tagata uma e fia palota. Ae afai o le faiga lea, e faigata tele foi i nai tagata ona lau atu. Aua a alu atu e fia.....o le isi tagata e tasi le tagata ae lima tusi e tataua ona avatu. Ta te alofa i le Matagaluega po o fea..... tafefe i se faulaiga tusi lea e i ai nei.

Lau Afioga i le.....

FOFOGA FETALAI: Ua maea le taimi o le sui usufono mo Faleata Sisifo.

Tofa LEALAILEPULE RIMONI AIAFI: E le afaina lau Afioga, leaga ou te ava ia te oe. Lau Afioga i le Tamaitai Minisita ma le Matagaluega, se i alofagia nai fautuaga na ua avatu, se i toe tagai ane i ai mo le faataliga o le tatou faiga palota o lumanai nei. Ia manuia sui usufono mamalu. Faafetai.

FOFOGA FETALAI: Tulai mai le sui usufono mamalu mo Aana Alofi Nu.3.

Afioga TOELESULUSULU CEDRIC POSE SALESA SCHUSTER (Aana Alofi Nu. 3): Faafetai i lau Afioga i le Fofoga Fetalai mo le avanoa. E muamua lava ona avatu le faafetai ma le faamalo i le Afioga i le Tamaitai Minisita aemaise le Matagaluega i le suiga ua faaooina mai. E talitonu e moni le saunoaga a le Afioga i le Palemia, o le tele lava o le lelei o le galulue a le Minisita ma le Matagaluega lea ua mafai ai ona toe faaoo mai nisi o suiga fou, sa faapea ona saunoa ma faaalua foi i atugaluga i alii ma tamaitai sui usufono o le Maota nei.

Lau Afioga i le Fofoga Fetalai, e talitonu o lou lea talitonuga e taua le pasia loa o le Tulafono Tau Faaofi, ua tataua ona faagasolo ona e tele suiga ae o le tuualalo lau Afioga i le Fofoga Fetalai, i nisi foi o vaega e ao ona silasila i ai, e le gata i le Minisita aemaise le Matagaluega, e le gata i le faatinoina o le

latou tiute mo le palota o lo o lumanai nei aemaise foi o le toe iloiloina o nisi o vaega e ao ona faaleleia mo le lumanai.

E muamua lau Afioga i le Fofoga Fetalai, i le vaega lea ua faaooina mai o le fa tausaga. O lou talitonuga lau Afioga i le Fofoga Fetalai, e ao ona toe silasila i ai i le vaega lea ma le vaega muamua o lo o sau ai le tolu fonotaga e le mafai ona Fono ai se sui usufono ae leai se faanoi po o se permission mai le Fofoga Fetalai, e mafai ona aveese sao ai lava le sui usufono. Afai la e fuafua atu i le fa tausaga lea o le a i ai, afai e mafai ona faanoi a o nofosala ai se isi i le falepuipui, e mafai lava ona maua pea le totogi mo le fa tausaga lea na o le nofosala ae le mafai ona usufono. E le gata foi i lea lau Afioga, po o le lua tausaga pe fa tausaga, o le umi lava lea e mafai ona... O lou lea talitonuga lau Afioga i le Fofoga Fetalai, se i toe silasila ina ia mafai ona ogatusatusa vaega ia e lua.

Ona ou oo mai lea lau Afioga i le Fofoga Fetalai i se tasi o vaega na saunoa i ai nisi o sui usufono i le vaega lava lea i le taimi nei i le faatinoina o le resitala. E maitauina o lo o faaalua foi e le Sui Komesina ma nisi o vaega o lo o mafai ona faamamaina ai, peitai ane o lo o maitauina pea le manaomia e le Ofisa o Faiga Palota, e le gata i pepa fanau a o lea e fai mai e avatu le uso, le tama po o le tina i totonu ina ia faamaonia le tagata lea e alu atu ma lona pepa fanau, pe i ai foi se pulenuu po o se sui o se nuu e faamaonia ae manaomia lava le i ai o se tina po o se tama e faamaonia.

O lou lea talitonuga lau Afioga, e pei lava ona saunoa foi nisi o sui usufono, a e alu e fai lou passport e aumai le pepa e sainsi atu ai tagata ia ma e le toe manaomia lou toe alu e toe pue mai se isi ata e faamaonia ai o oe lava lea. Ia tatau ona silasila foi ia gatusatusa vaega i lona faatinoina ina ia aua foi nei tele galuega fai a ia maua pepa uma e mafai ona faatinoina e faafaigofie ai ona e resitala.

Lau Afioga i le Fofoga Fetalai, o nisi foi o vaega e avatu ai foi se tuualalo i le vaega lava lea o le resitalaina o tagata palota ona o lenei foi vaitau o lea ua maitau atu ua i ai le tatou broadband, ua malosi foi le initaneti, pe le mafai ona silasila le tatou Pulega po o le Matagaluega foi i le faia o resitala on line. O le tele foi o atunuu ua faafaigofie lea itu ma le o i le uumi o queue, a o lo o i ai vaega e mafai ona log on line ai tagata ona resitala ai lea. E le gata foi i lea, o i latou o lo o i atunuu i fafo. Ua maitauina lea ua maoti i lalo o le tatou Tulafono le mafai ona palota i latou o lo o palota mai fafo. E ao ona afifio mai i totonu o Samoa i le taimi o faiga palota ona faatoa mafai lea ona palota. Peitai ane, o le tele foi o nisi o alo ma fanau, aemaise foi o aiga o lo o aumai i fafo, e le gata i aoga i taimi e fai ai le resitala. O le faataitaiga o tamaiti aoga i le USP, o ia vaega atonu pe mafai ona i ai se auala e vaavaai i ai e mafai ai ona resitala mai fafo ona i luga lea o le tagata le mafai ona oo mai i nei e palota, a ia mafai ona resitala mai fafo e fua ai foi le toe foi mai a ua tapunia le taimi o resitala.

Lau Afioga i le Fofoga Fetalai, ma le vaega lea e talitonu e ao ona silasila mamao i ai le tatou Malo, o lo o taua, atonu e faaitiitia ai foi lenei vaega o le tau fai o resitala, e le gata i faiga palota a o le tele o nisi vaega o manaomia, o le silasila lea o le tatou Malo i le faia o se national identification card a tagata uma, e mafai ona faaogaina lea, afai ua i ai lau national Id i le taimi o le aoga e pue ai e fai ai lau finger print e oo ifo i le taimi e manaomia ai lau NPF ua connect sao i ai lau internet e oo foi i le taimi e resitala ai, e sue atu o la ua tofu uma lava. E 180,000 le tatou atunuu. E talitonu e le tele se vaega e

mafai ona faatino ai ae ua tasi ai le tatou computer system e sefe uma ai vaega ia ona faigofie foi lea ona siaki i le taimi e resitala ai Id po o le faiga o passport, o le apply o visa, po o le faiga o NPF ma so o se vaega o manaomia ai a ua i ai le central location lea e i ai uma tatou Id, ae le gata foi i lea e manaomia i taimi o faamasinoga. O le fesoasoani atu lea lau Afioga i le Fofoga Fetalai. Faafetai.

SUI FOFOGA FETALAI I LE NOFOA:

SUI FOFOGA FETALAI: Malo faafetai i lau Afioga i le sui usufono mo Aana Alofi Nu.3.

Tuu atu le avanoa i lau Afioga i le sui usufono mo Gagaemauga Nu.2.

Tofa LEVAOPOLO TALATONU: Faafetai i lau Afioga i le Fofoga Fetalai mo le avanoa e avatu ai foi se vaivaiga o lenei itumalo e tusa ai ma lenei Tulafono Toe Teuteu. E le umi foi se matou tala.

Na pau lava lau Afioga i le Fofoga Fetalai ua ou tulai atu ai i le ava ma le faaaloalo, o le Tulafono Tau Faaofi o Faiga Palota lau Afioga, o le Tulafono aupito sili lava lea ona faigata i lau lena vaai. E tatou te fiu e teuteu, toe teuteu pe ta lava le palota o teuteu, e leai sona atoaga. E mafua lau tala lau Afioga i le Fofoga Fetalai, ona o lea tatou te fetagofi e taumafai e tuufaatasi le tatou aganuu ma le palota a papalagi. O le tulaga aupito sili lena ona faigata, ae talosia na o le pau lea o se teuteuga o le a aumai.

O le isi foi itu i lau vaai, vaeatu le paia o le Maota ma lau Afioga ma le faafogafoga mai a le atunuu, o le auupega aupito sili lava lea ona maai i so o se isi lava auupega o le mea lea o le Tulafono. O le mea lea ua ou tau maitau atu i le itu le la pei ua ou tau vaai atu ua i ai nai popolega ua aumai ai le Tulafono Tau Faaofi lenei. Ia onosai e iloa le auro i le afi pe a... ae aua le aumai le Tulafono Tau Faaofi e fai ma auupega i le tatou palota. O le mea la lea ua tupu nei lau Afioga i le Fofoga Fetalai, la foi ua toe fasi foi le gata ae pupula o la mata, le Au Palota Taitoatasi ia. Aua lea ua uma ona tatou liliu i le faaleaganuu Nofoa ia ia i ai o la matai ae ou te le iloa po o fea ni alaafaga o fai ai a la monotaga. O le tulaga lena e pei ua fai lava sina lavelave o le tatou Tulafono, o le sailiili foi lea i le tulaga e maua ai le manumalo.

Lau Afioga i le Fofoga Fetalai, ona ou oo mai lea i le auga tonu o le....

SUI FOFOGA FETALAI: Ou te faauilavea a o saunoa lau Afioga i le sui usufono. E na o sina faamatalaga lea a le Nofoa e fia fai atu leaga e tatau ona ou faasaoa, e leai ma se vaega o le Tulafono Tau Faaofi o tatou talanoa ai i se auupega. O le faigofie ia o le Tulafono Tau Faaofi, leaga e tau faauigalua le saunoaga. E tatau ona ou faasao atu, leaga o au lea ou te nofo i le Nofoa i le taimi lenei. E pei ona saunoa le Palemia i le taimi ua tuanai atu, ae ou te fautua atu ia tuusao le saunoaga ona vave lea o le tatou Tulafono Tau Faaofi, ma le faaaloalo.

Tofa LEVAOPOLO TALATONU: Faafetai i lau Afioga i le Fofoga Fetalai mo le faauilavea. O nai manatu lava foi e tuuina atu ina ia manino mai le tulaga lea e taoto ai le tatou Tulafono Tau Faaofi.

Ona ou oo mai lea i le auga lea ua faaali mai o le tautua ma le monotaga. I lou manatu i le fa tausaga lea, e le tatau ona faia, e le tatau ona toe aumaia lea

fa tausaga, aua o le upu moni lava lau Afioga i le Fofoga Fetalai, e agavaa uma lava so o se sitiseni Samoa. E amata mai lava i le lima tausaga e te tau mai i le age lea ua e sui usufono ai, ua leva ona e tautua. Ia manatua foi lau Afioga i le Fofoga Fetalai, e lima loa ou tausaga e savalivali loa i le fale o le faifeau, e te alu atu ua leva ona tautau mai le Pi a le faifeau e alu atu e faitau, A, E, I, O, U, F, e alu atu lava lea i tua. Oo i le Aso Sa lafo lau sene, Aso Sa uma lafo lau sene. Lea foi ua oo i le vaitaimi lenei i le taulaga o le Me ma mea ia, lea foi ua fai le taulaga a le Aoga Aso Sa. O le a la le mea lena? O le tautua ma le monotaga, seia oo ina ua e pasi atu i luma i le isi laasaga o lou taulealea, e te alu i faiva o taulelea e tausi ai le fonu a le nuu. Se i vagana lava se papalagi e le i alu e fai le tautua lea. Ona oo foi lea i le matai fai lau matafale ma resitala lau monotaga.

O le mea lena lea e tau fesili atu ai lau Afioga i le Fofoga Fetalai, ona o le monotaga o le resitala i totonu o faiganuu ma Ekalesia. O lea e fai atu lau tala lea i le matou nuu, e tasi lava le tagata faigaluega la e i ai e faiaoga a o isi vaega uma lava e le o latou maua ni tupe e fai ai saogamea i monotaga ia faalenuu, e faalagolago uma mai lava i o latou alo ma fanau o lo o nonofo iinei i Upolu e avatua tupe e faatino ai a latou mea ia.

A o lea ou te tilotilo atu i le Tulafono Tau Faaofi, o le a le agavaa la tagata ia pe afai e le lesitala a latou monotaga. E misi loa i nei ia alu loa i Niu Sila, Ausetalia ma atunuu i fafo i o latou aiga. O le mea lea na ou fai atu ai lau Afioga i le Fofoga Fetalai, e fai lava si lavelave o le mataupu lenei. Ma ou te fautuaina ia aveese lea.... vaeatu lava lou gutu ma le afi i le galuega sa faatino i le teuteuga, e le lava le fa tausaga lea ae tuu i le luasefulu tausaga po o le tolusefulu tausaga ona manino mai lea po o ai la le tagata sa soifua mai i totonu o Samoa ma fai le tautua lea na ou fai atu ai ananei.

Ma le agaga faaaloalo. Faafetai.

SUI FOFOGA FETALAI: Malo saunoa i lau Afioga i le sui usufono mo Gagaemauga Nu.2. Ia o le a tatou see atu i lea itu o le malu.

Tulai maia lau Afioga i le sui usufono mo Faasaleleaga Nu.4.

Afioga PESETA VAIFOU TEVAGA (Faasaleleaga Nu.4): Faafetai i lau Afioga i le Fofoga Fetalai. E faatalofa atu foi i le paia ma le mamalu o le Maota. E fiafia lava lenei itumalo e fia molimoli atu sona sao e tusa ai foi ma lenei Tulafono Tau Faaofi taua. E muamua foi ona momoli atu le faafetai i lau Afioga i le Minisita ona o lenei Tulafono Tau Faaofi, e ui lava o se Tulafono Tau Faaofi Faanatinati a o le tele ia o lona taua.

Sa faitauina ma le totoa ma faalogologo foi i nisi o saunoaga matagofie. Ma ou te faafetai o lea ua aumai lenei Tulafono Tau Faaofi ua tolu tausaga e fai ai lau tautua, aua o le mea moni lava o le tele lava o a outou Afioga i sui usufono mamalu ua leva ona fai le tautua i totonu o nuu ma afioaga. Ma sa manatu lava tatou te o i le sefulu tausaga ona e agavaa lea e te sau i le palota ona e le faigofie i nuu ma afioaga le tofa filifili i se sui ua tatau ma onomea ma agavaa e tofi mai i le Maota lenei. E ui lava o lea ua aumai le Tulafono Tau Faaofi e tolu tausaga, e avatu ai foi le lagolago a lenei sui usufono mamalu.

Lau Afioga i le Minisita, o lea e pei e vaai atu i le Tulafono Tau Faaofi o lea e faamamafa mai le upu lea o le tautua, lea sa aumai i le saunoaga a se tasi o sui usufono mamalu le upu o le monotaga, aua o le tele lava o nuu, a uma ona

fai o matai o le aso lava lea e tapa ai le monotaga. O lea la e pei e le o mamafa mai le monotaga i le Tulafono Tau Faaofi, ma e tatau ona toe silasila lau Afioga i le Minisita, e manaia ae tuufaatasi lava upu ia e lua, tuu i ai ma le monotaga, o le tautua o le monotaga lena. Ona e i ai i latou e uma loa le matai, sau lea nofonofo i Apia nei ae leai se monotaga o faia, ae a oo la ina fai ni faalavelave i totonu o afioaga po o ni umusaga o ni malumalu, ia e avatu le latou tautua, tautua atu o latou aiga o lo o nofonofo i le nuu. E pei la o se lavelave lea e tatau ona toe silasila i ai lau Afioga i le Minisita, aua afai o ni mea a le nuu e tufa, e o i monotaga ae le o i tautua, e faapena. Afai foi o eleele o le nuu o le a vaevae i matai e oo foi i matai o lo o fai monotaga, ae le o le matai tautua ae leai se monotaga.

O le mea la lea lau Afioga i le Fofoga Fetalai, e taua ma o lea e manaia lava le aumaiga o le Teuteuga lea, ae tuu i ai le upu lea monotaga, leaga e eseese mea, aua o le isi e totogi le tupe. O le tele o afioaga e pei o si o matou nuu, e i ai le mea lea e tupu i le nuu, ia ua tele foi ina i ai ia tulaga ua tapa tupe, totogi le \$1,000 o lau monotaga lava lena e oo mai i le faavavau, e tusa lava pe leai sau mea e faia i totonu o le nuu, ae totogi le \$1,000 ia o lau monotaga lena pe leai lava sau tautua, tusa o lena ua tau le mea lena o lau monotaga. I le vaavaai atu la i le Tulafono, pei o lea e faamamafa mai le tautua, ae a oo la ina filifili le itumalo ma le nuu, o vaega uma lava ia e silasila i ai ia le afioaga i so latou sui e fia tauva i le tofi o le faiga palota e aumai i totonu o le nuu le manao, ona fetuفاai lea o finagalo, pe o lea matai o se matai o fai se tautua, ae po o fai foi se monotaga. O lona uiga, a le tuu la i ai ma le monotaga e o faatasi ma le tautua, e le o atoa la, e le o atoa la le tautua, e tatau ona tuu i ai le monotaga ona atoatoa lea o le Tulafono lea.

Lau Afioga i le Fofoga Fetalai, e momoli atu lava le faafetai o lea ua aumai i luma le Tulafono lenei, ae o lo o i ai lava se tasi o vaega e ao pea ona toe teuteu. Lau Afioga i le Minisita, o le tulaga lea e uiga i le taimi lea e aumai e faagata ai le faiga o Id palota, ma le taimi o lea ua faatulafonoina e faagata ai le tagata e fia tauva i le faiga palota. Silasila foi lau Afioga i le Minisita, o le taimi lea e faagata ai ia Id, ia e alu atu i le Kerisimasi, o le taimi sili lava ona ogaoga i le sui usufono o lea e nofo i le nofoa, o tatou uma lava, aemaise pe afai o se sui usufono e le o faailoa i lona nuu ma lona afioaga lona fia alu i le tofi tauva i le taimi lenei, ia o lea o le a oo mai le Kerisimasi – ma ou te fai atu lava, o lea e tui mai lava tatou, pe tui mai lava a outou Afioga e nai o tatou tagata o nuu ma afioaga, o mea e tatala i le taimi o le Kerisimasi, o tausala, o malumalu o mea faapena – ma e leai lava se sui usufono o lenei Maota e alu atu i totonu o le valaaulia a lona nuu ma lona afioaga, ae alu atu fua e leai se mea. O le uiga o se manatu, afai la o le sui o lea e fia alu i le palota ae le o faalauiloa i le taimi lenei, ae faatoa iloa i le taimi o Ianuari, o lona uiga, e na o le lama mai lava e latou lea o tatou nei, aua e leai lava se isi o le Maota lenei e le o silafia e le atunuu e toe alu i le palota, a o le sui lea e lafilafi i tua e le o faalauiloa, ia o lea ua ou fai atu, e na o le lamalama lava o tatou nei i le taimi lea, a o le taimi leaga lava lenei, o le taimi lava lenei e lata i le Kerisimasi. O lea e tatalo atu ai i lau Afioga i le Minisita, ua tatau, afai o Novema e tapuni ai le faiga o Id o le palota, tapuni ai loa i i ma tagata e fia o i le palota, ona paleni lea, e taufai o uma e ave mea e mananao ai nuu ma ekalesia i taimi ia o le Kerisimasi, leaga e le o paleni le mea lea, e le o paleni. Aua na o le pau lava le mea e oo i le mea lea, o le toe fai foi o le Faamasinoga (.....).

Ioe, omai. A i ai lava le sui e fia tofo i totonu i i, omai tatou taufai o faatasi ae le...e unfair, e le o fair le Tulafono le tapuni o Id ia Novema ae tapuni le tagata fia alu ia Ianuari. Ia o le a le mea o le a toe fai ua uma le kerisimasi ua uma Id ua uma ia tausala ma mea faapena, leaga o le tulafono ma mea ua uma ona tutupu, ua tele foi i latou sa tutupu ai i le mea lea.

Tofa Levaopolo Talatonu: Lau Afioga i le Fofoga Fetalai o se mea e fia faasao.

SUI FOFOGA FETALAI: Se i tuu atu le avanoa i le faauilavea a le sui usufono mo Gagaemauga Nu. 2.

Tofa Levaopolo Talatonu: Ua saunoa le Afioga i le Minisita Lagolago i le tulaga a o la e maitau le atunuu i le tulaga o le solitulafono, ma ou te le fia solitulafono, a e fia solitulafono lava oe fai lau solitulafono, faafetai.

SUI FOFOGA FETALAI: Tulai mai le sui usufono e faaauau lau saunoaga.

Afioga PESETA VAIFOU TEVAGA: Lau Afioga i le Fofoga Fetalai, o so o se tagata tautua lava e o lava i mea e lua, o le solitulafono ma le lē solitulafono, afai lava la na o lou nofonofo i Apia nei ae le alu i Savaii e fai le mea lea, ia o lona uiga e te le fia solitulafono, o lona uiga e te le o fia faia foi se tautua.

Lau Afioga i le Fofoga Fetalai.....

Tofa Lealailepule Rimoni Aiafi: Lau Afioga i le Fofoga Fetalai, faamolemole lau Afioga i le sui usufono mamalu o le fesili.....

SUI FOFOGA FETALAI: O le a le mea lea e te tulai mai ai....?

Tofa Lealailepule Rimoni Aiafi: O le Kerisimasi, o le mea e tupu i tausaga uma, e le o se mea fou, o le aso fiafia, o le aso filemu. O le a le mea ua fefe ai le sui usufono i le Kerisimasi o lenei tausaga, ae faapefea isi Kerisimasi ua tea atu? O le a le eseese o le Kerisimasi lenei ma le Kerisimasi o le tausaga na tea nei? O au a oo...e Kerisimasi aso uma o le olaga, o le mea lena e tataua ona silafia e le sui usufono, ma le faaaloalo lava.

SUI FOFOGA FETALAI: O lea ua maua atu lou finagalo, e eseese Kerisimasi o le 2014 le isi ae o le 2015 le isi.

Ua ou vaelupeina le saunoaga a le sui usufono ona ua tatou toai taunuu mai i le tatou malologa masani. Na ona ou fia faamanatu atu i le sui usufono, o so o se isi lava e nofo atu i luga o le Nofoa lenei, e le o se Sui Fofoga Fetalai, o le Fofoga Fetalai.

E faasilasila atu o le a faataatiaese Taulumaga a le Fono Aoao mo lana malologa masani.

Na faataatiaese Taulumaga a le Fono Aoao mo lana malologa masani i le itula e 10:45 i le taeao ma toe amatalia i le itula e 11:43 i le taeao.

FOFOGA FETALAI: E faasilasila atu ua toe amataina nei Tualumaga a le Fono Aoaofa Fofoga.

E maualuga le taofi ua maea le palegaauau ma le taliga o le sua, ma ua maua foi le faasiliga malosi aua le tatou faiga malologa sa alo atu ai, e faamalo atu le onosai ma le lavapapale i le tatou Maota i lenei vaega o le taeao.

E faia le tatou malologa o lo o saunoa le sui usufono mo Faasaleleaga Nu. 4, tulai mai le sui usufono e faauma mai le saunoaga.

Afioga PESETA VAIFOU TEVAGA: Faafetai i lau Afioga i le Fofoga Fetalai, ua maua le faamalositino o le mamalu o le Palemene, e momoli atu ai le faafetai tele i lau Afioga ma le mamalu o le Matagaluega. E talu ai ona sa taumafai atu le sao o lenei itumalo ona o se tulaga lava tau i le Tulafono lenei o Faiga Palota. Ma e i ai lava le agaga maualuga i lau Afioga i le Fofoga Fetalai, afai o lea ua teuteu ia le vaega lea o le Tulafono i le tulaga lea o le tautua, e tatau lava la ona teuteu mea uma. O lona uiga, e pei la ona ou avatua le tulaga lea i sui foi nei e le o mautinoa e nuu ma itumalo, o le taimi lenei, o lo o silafia pea e afioaga ia Afioga foi i sui usufono mamalu o le Palemene mo le Faiga Palota – ma e o lea ua faamamafa i le Tulafono le tautua, pei lava foi ona ou avatu, o lea o le a oo i le taimi e matua ilitata ai le Tulafono Tau Faaofa lenei. Na aumai se faauilavea a le sui usufono mo Faleata Sisifo i le Kerisimasi. Aisea lenei Kerisimasi, ae le tutusa uma Kerisimasi?

Lau Afioga i le Fofoga Fetalai e eseese Kerisimasi. O le mea lenei o le polokiki, e faapea uma lava le taaloga lea a Amerika o le Super Ball, e amata loa le Liki, taaalo uma lava tagata i rules, e tatou te taaalo i le tulafono, e fili loa au e lua o le a taaalo i le Super Ball, ona faapena lea ona avatu le fautuaga a le Coach, taaalo i le tulafono, tautuana ia tatou manumalo. Ae a oo loa in the last five minutes, the last quota o le teine, ua vaavaai atu le coach i lana au e faaletonu, ona fai loa lea e le coach le upu lea, “everything must go,” tui, u, moko, e faapena le taaloga lenei, leaga o le taaloga e le faigofie, ioe, e sue lava e le sui usufono mamalu ia po o le sui e fia tauva i le Faiga Palota le mea e malo ai, ia tiai uma lava ia nei Tulafono e tatou te faia, o le mea lena a le sui usufono ia pe a uma.

FOFOGA FETALAI: Ia mo le tausisia o le mamalu o le tatou Tulafono ma le faamaninoaina, ou te avatua le avanoa i le Afioga i le Minisita.

Tulai mai lau Afioga i le Minisita mo Faamasinoga ma Pulega Tau Faamasinoga.

Afioga Hon Fiamē Naomi Mataafa: Lau Afioga i le Fofoga Fetalai, e tulai atu ma le faaaloalo ona o le saunoaga a le sui usufono, i le tulaga lava lea o le faia o le solitulafono. Ia ou te le mailoa i lau Afioga ma le mamalu o le Palemene, o tatou o tagata e tausia le Tulafono, ma tusia le Tulafono, ma pasia le Tulafono. E i ai lava lou faaeteetega, na maitauina lava le saunoa mai o le sui usufono ae le i malolo le tatou Fono, aumai pea le feau lea, e sili ona tatou o e soli le Tulafono. Ia te au lava ia e ou le Tulafono o au foi o le Minisita mo Faamasinoga ma Pulega Tau Faamasinoga, ou te talosaga atu i lau Afioga i le Fofoga Fetalai, e le o se tulaga lelei lea i le faafogafoga mai a le tatou atunuu, pe saunoa foi sui usufono i tua atu o le Maota, atonu e le afaina lea. Ae o le faafogafoga mai a le atunuu ma faapea ia lafoga i totonu o le tatou Maota ae le faia i ai se upu, ona i ai lea o lou popolega faa-sui

usufono, o lou lava sui usufono e toatasi. Ma o lea ou te talosaga atu ai i lau Afioga i le Fofoga Fetalai, e le faia sau tala i le sui usufono, aua e avanoa lava ia le sui usufono e saunoa ai lava i lona finagalo. Ae ou te talosaga atu ai i le Nofoa e tusa ai ma le faafoega o le tatou Fono ia ma a tatou Tulafono Tumau e puipuia ai ala o mea e faagasolo ai a tatou galuega.

FOFOGA FETALAI: Ia se i tulai mai lau Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, ou te talosagaina ina ia soloiaese upu ia na saunoa i ai le sui usufono mai i a tatou Faamaumauga.

O lena ua tulai atu ia le Afioga i le Minisita, o tatou e faia Tulafono. E le lelei i le faafogafoga mai a le tatou atunuu, o tatou e faia Tulafono, ae toe alu atu ai ma le siuleo, tatou o e soli le Tulafono. E le fetai. O le ala lena e taua tele ai le soloiaese o upu ia. Ona o faamaumauga uma nei e alu atu i fafo i a tatou Hansard i Record i Faamaumauga o le Fono. Ina ne i te i ua faapea nisi, ai o uiga ia o le Maota nei, e fai Tulafono ae toe solomua tatou ona soli.

Lau Afioga i le Fofoga Fetalai o le tulaga lena, e i ai lava le lape o upu, e i ai foi le taimi e vave ai le tatou lauga foi lea faatalitalie, ia ae pei e sau ai mea ia, ae aua foi ne i galo ia i tatou, e tele le tiute o lo o ia i tatou, ia amatamea i tatou i so o se mea e tatou te faia.

Lau Afioga i le Fofoga Fetalai, e amatamea tatou, ia muai taiala tatou i le tausisia o Tulafono e tatou te pasia atu i le Maota leneni.

FOFOGA FETALAI: Ia se i avatu pea le avanoa le sui usufono mamalu mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, e le toe oo se faamatalaga o lea ua saunoa manino le Afioga i le Palemia ma le Minisita i le vaega lea sa ou.... Ae pau o le mea lea na ou taua e uiga o lau faamatalaga mo le Kerisimasi o le tausaga nei ma tausaga uma, o lena e i ai i le Tulafono le mea foi lea e tau o le tautua faaauau. Afai o lau masani i Kerisimasi uma e te alu e asi lo outou nuu ma outou aiga, ia e tagai foi Faamasino i vaega ia i mea e masani ona fai, afai la o le sui fou o lea e fia alu i le palota ae alu atu ma mea fou, ia e iloa foi e Faamasino ona tilotilo i le vaega lea, pei o le mea lea ou te talanoa atu ai, afai lava o lau masani o lau tautua masani i lou itumalo e fai i Kerisimasi taitasi, aua e te popole, aua e te fefe. Ia a o lena ua saunoa manino e tusa ai o isi vaega, ia ma le faaaloalo lava faafetai.

FOFOGA FETALAI: Faafetai, e manatu o lea ua faafofoga ma le manino le tatou Maota i le saunoaga a le Afioga i le Tamaitai Minisita. E manatu foi o lea ua manino ma malamalama le saunoaga a le Afioga i le Palemia. Ou te faatonuina ai le sui usufono e agai le saunoaga i tulaga o tatou Tulafono. O lea foi e taofiofi iumaea ma maitau ma le manino o lea e faafofoga le atunuu. Ua saunoa manino le Taitai o le Malo e le talafeagai i le faafofoga a le atunuu ona o uiga ma le tuutalaloa o saunoaga. E faufautua atu foi e le gata i le sui usufono o Faasaleleaga Nu. 4 o lo o saunoa nei, a o nisi o sui usufono mamalu, leaga e maaleale le mataupu. Ina ne i o tatou naunau tele i lo tatou

manatu i le tulaga e faaataata a lafoga, ia ae le talafeagai ma le tulaga sagatonu e tatau ona i ai.

Ua faatonuina ai le Failautusi o le Fono Aoaofaitulafono, ia soloia upu ia ma a tatou Faamaumauga, ia aveese ina ia aua ne i atagia le faamamasagia o tatou ia ae tatou toe faamanatu atu ia ma fai atu i le atunuu tatou te o e fai mea ia.

O le Tulafono Tau Faaofi lea tatou te agai mai e toe Teuteu, o le Tulafono e malu ai faiga filifiliga a Samoa. Afai loa e tapu e le toe i ai ni faatosina, le toe i ai ni mea e tasi e atagia ai ni uiga i tulaga o faigamea piopio ma mea faapena, o lona uiga, e tatau ona tatou usitaia uma pe a pasia atu iinei. A o le avatu iinei i le Maota, ia ona ou lagona lea e le talafeagai. O lea ua ou fautuaina ai le sui usufono mamalu, e see ese e faaauau lau saunoaga i nisi o mea, o lea ua manino le manatu ma ni lagona na avatu e le Malo aemaise foi le faatonuga lea ua avatu e le Fofoga Fetalai.

Tulai mai le sui usufono e faaiu mai le saunoaga.

[Upu na faatonu e le Fofoga Fetalai e aveese ma Faamaumauga, o le Saunoaga a le sui usufono mo Faasaleleaga Nu. 4: “Omai faatasi lava e tatou te taufai solitulafono faatasi i le taimi lea.”]

Afioga PESETA VAIFOU TEVAGA: E faamalulu atu foi i lau Afioga i le Fofoga Fetalai, faapea foi le Afioga i le Minisita e ana le Tulafono Tau Faaofi. Ia o manatu lava ia a le sui usufono e le tuua e ao pea ona avatu. Ae ui o lea, ia o le a see ese manatu i le vaega lea.

Ae pau lava lea o se tasi o vaega e avatu ai pea le tuualalo i lau Afioga i le Fofoga Fetalai, ona o le tulaga lava lea o le taumafai o se sui e le i declare e faamaumau ni faamaumauga e molia ai le sui o la ua uma ona declare. Po o le a se silasila i ai a lau Afioga i le Minisita pe talafeagai? Aua o le mea moni lava, afai o le taimi lenei o lea ua seei ai le Nofoa, ae a oo i le aso e faagata ai le faauluga o tagata tauva, o lona uiga, e le tatau la ona agavaa i se sui e manao e molia se sui ua uma ona declare pe a faapea o lea e tuai ona declare.

E pei o le talosaga lea lau Afioga i le Minisita se i silasila ane, aua ua tatau ma agavaa i le sui e tauva ma le isi sui ona faia se moliaga, pe a faapea ua uma ona faaulu pe declare i totonu o le Ofisa o Faiga Palota.

Lau Afioga i le Fofoga Fetalai, o se manatu lena o lenei itumalo, e momoli atu ai le faamalo ma le faafetai ma lagolagoina ai ia le tele o lo o i ai ia le Tulafono lenei, ma lou faaaloalo lava.

FOFOGA FETALAI: O le a lafo muamua i lea Itu o le Maota ona avatu ai lea o le avanoa. Tulai mai le sui usufono mo Faasaleleaga Nu.2.

Susuga PAPALII LIO FAAVAIIVAIOMANU TAEU MASIPAU (Faasaleleaga Nu. 2): Faafetai i lau Afioga i le Fofoga Fetalai mo le avanoa, faafetai foi i le Afioga i le Tamaitai Minisita mo lenei suiga. E talitonu ua tele ina saunoa manino ia le tele o sui usufono i atugaluga, o atugaluga foi lena sa i lou sui usufono, a o lea ua faailoa atu i le faafofogaaga foi a le Afioga i le Minisita faapea le paia o le Maota.

E i ai nai vaega laiti ia i lau foi vaavaai i le Tulafono, ua sau foi le suiga lea i le tautinoga. O lea e faamanino ai le tautinoga o le nofomau, faapea foi le tautinoga o le tautua. O lea ua manino mai le tautinoga o le nofomau lea, aemaise lava nai o tatou uso ia i nofoa ia tu taulaga, lea ua faamanino mai i luga o le pepa o le tautinoga. Ae oo mai loa i le tautua ua faapea mai, tautua i lo'u nuu, o i ina lea ua le malamalama ai lou sui usufono. Po o gafea tonu le nuu? Po o le nuu lea e suafa matai ai po o le nuu lea e alaala ai. O nai vaiiliu na o lea e vaavaai i ai, ou te alofa foi ia i latou o lo o fougou i nofoa ia tu taulaga, e tatau foi ona faamanino lelei, aemaise lava le tautinoga ia manino lelei e taipei o le tautinoga lea o le nofomau o lea ua manaia ua manino, ae oo loa i le tautua, o i ina la pei ua tau nenefu ai i lau vaai faasui usufono ina ia manino e faatatau mo latou o lea e fuafua i nofoa ia, ia fai lava le tautinoga ua mautinoa mea uma. O le agaga lava ia o le tautinoga ia e pau lava i luga o le sui faatu ia lana amiotonu. E pei o le agaga lena e lelei le manino, ina ia faatino le tautinoga, aua o le tautinoga e fai i luma o le loa ae le i faamaonia. O lona uiga, a faapea foi e le atoatoa, o lona uiga e aafia foi i le Tulafono mulimuli ane. A o le manino semeamanu o lea tatou te i luga o le agaga o lea e tatou te i le Tulafono ina ia manino ma faamanino le vaega lea ina ia aua ne i i ai se faanenefu aemaise lava ia tatou sui ia mai nofoa fou ia tu taulaga.

E tele lava saunoaga i le tautua, ae ona ua nonofo foi ma aumai le tolu tausaga ia, ae ana faapea lava o le tautua lava o le tautua. E pei o le agaga lena lea ua tele ai a tatou ona o le suiga lea ua aumai e faatapulaa i le tolu tausaga. Ia manatua o le tautua lava ia, o le tautua. A faamanino la le tautua, o ai la e faamaninoa le tautua? E faamanino lava e le sui faatu ia lana tautua. A faapea loa la e manaomia ni faamaumauga ma ni mau e ave i luma o le Faamasinoga, o le nuu e omai e fai le tautinoga i luma po o sao le mea lea. E pei o itu faapena lea e tilotilo i ai, ae manatua foi o tatou nuu o la ua silafia uma lava e tatou nuu, o e o lo o tautua ma e o lo o faapena e masani i mea uma. Ona o lea ua tatou aveatua i le Tulafono e faatapulaa le tolu tausaga, e pei la ua tau i ai sina nenefu faapena. A o lau lena vaavaai ma le tilotilo, o le tautua lava ia o le tautua. Po o ai lava ua tautua i so o se mea, ia o le agaga lena lea ua manino ai. Na pau ia o nai mea o lea ou te manatu e avatu pea i lumamea, e aoga foi e silasila i ai le Maota, ma le faaaloalo.

FOFOGA FETALAI: Malo saunoa, tulai mai se tasi o sui usufono mo Palota Taitoatasi, Susuga Hon Papaliitele Niko Lee Hang.

Susuga Hon PAPALIITELE NIKO LEE HANG (Palota Taitoatasi): E momoli atu le faafetai i lau Afioga i le Fofoga Fetalai mo lou avanoa.

Ae le i fia faaalua foi se manatu i le Tulafono Tau Faaofi, e muamua ona faamauina le agaga faafetai ma le faamalo i le Afioga i le Tamaitai Minisita aemaise foi le Ofisa o le Komesina o Faiga Palota, ona o lenei Teuteuga lona tolu o lenei Tulafono Tau Faaofi. Ma o sou manatu vaivai ona ua lata le taimi o le Faiga Palota, ia talosia ia ua lava ia Teuteuga ae tatou faagasolo loa e pasia lea Teuteuga ma tatou tapena loa i le tatou Faiga Palota e le o toe mamao.

Lau Afioga i le Fofoga Fetalai, ona o lea ua fesiligia pea e sui usufono le tulaga o le matou Nofoa lea sa Palota Taitoatasi lea ua liliu nei le Nofoa Tu Taulaga i Sasae ma Sisifo. O le mea moni lau Afioga i le Fofoga Fetalai, o le tulai mai o Nofoa nei mai le amataga e le matai, ma ou te talitonu foi o le

tulaga lena sa le faamamafa ai ni monotaga, pei o le tulaga lea. Ae ou te talitonu o le tautua ia, e le o po lava se lilo i le tautua o sui usufono mamalu ia na tulai mai i Nofoa ia o le Palota Taitoatasi i nuu ia e aafia foi i le auunaga ma le tautua foi a sui usufono mamalu ia sa tulai mai i le tofi.

Sa fesiligia foi e le sui usufono mamalu mo Gagaemauga Nu.2 le tulaga lea, ia ma sa talitali lava e ia lana fesili e faapea o le lima o ona tausaga sa tautua mai ai i mea ia o tautua. Ae ou te talitonu ona o le tulaga lava lea o le tautua, o lea foi la ua tulai mai faiga fou ia e fai le aiatatau, fai lau filifiliga, pe te alu i lou suafa matai pe te lesitala i le mea lea ua e nofomau ai i lou freehold property. O le tulaga lea e fia fesoasoani atu i le fesili lea sa fesiligia ai e le sui usufono mo Faasaleleaga Nu.2 i le itumalo, aua a faapea la e te filifilia le matai e te palota i le freehold i le isi avanoa lea, ia ailoga e taua lea mea e te alu e tautua i le nuu lea e te matai ai, a e tautua i le nuu lea ua e alaala ai ma e afio ai le freehold, le option lea e tuuina i le tagata e i ai lona fanua freehold e nofomau ai ia i inei i le taulaga ma palota ai ia ma alu e tauva mo le sui tauva o nofoa ia tu taulaga i Sasae ma Sisifo.

Ou te talitonu e le o se... a faapea e tautua la oe i le nuu lea ua e nofo ai i lou freehold, o lena lava. E le tau alu i le mea lea e te suafa matai ai ne i meaane ua tulituliloa le suafa matai a o lea ua fai le filifiliga a le tagata ia e faaoga le freehold.

FOFOGA FETALAI: Tulai mai le sui usufono mo Gagaemauga Nu.2.

Tofa Levaopolo Talatonu: Lau Afioga i le Fofoga Fetalai, e faamalulu atu i le Afioga i le Minisita Lagolago, leai e le o i ai se tulaga i le tautua lava ia i le ekalesia. E le o fesiligia lena itu i lau Afioga ma le Afioga i le isi sui usufono o le lua sa seelua. Na pau lava le mea ona o lea e aumai pea le tulaga lea i monotaga faalenuu.

E pei o le ala lea sa ou fesiligia ai le vaega lea ina ia laugatasia uma sui usufono mamalu ma itumalo i se mea se tasi. Aua e le natia e tuusao atu pea lau faamatalaga, e leai ni faiganuu a Lotopa, leai ni faiganuu a Vaoala i mea oulua afifio ai ma oulua papaaao ai. E pei o vaega na sa avatu ina ia faamanino atili mai e le Tulafono i le faiga foi o mea na i monotaga faalenuu. A o le tulaga lava ia i lo oulua tautua i le ekalesia, leai e le fesiligia e se isi o lo o lelei atoatoa ma ua pepese Agelu o le lagi i le lua tautua i ekalesia, faafetai.

FOFOGA FETALAI: Malo, tulai mai le sui usufono e faaauau le saunoaga.

Susuga Hon PAPALIITELE NIKO LEE HANG: Faafetai atu i le sui usufono mo le faauilavea. O le tulaga lea e tau molimoli atu o le tulaga lea e faapea e faaoga la le tautua i le nuu lea e matai ai. O le mea lea e tau faapupula atu ona o le avanoa lea e tuuina atu foi i le matai e fai ai lana filifiliga i lona ia aia tatau, pe alu i le mea lea e matai ai pe lesitala loa ia i le fanua lea e nofomau ai i lona ia lava fanua umia saoloto i totonu o le taulaga., e pei o le tulaga lea. A o le tautua ia, masalo o la ua saunoa mai le sui usufono mo Gagaemauga Nu.2, o le tautua ia a lou nei tagata, masalo o se tautua e ui mai i ou tuua, i le tautua malo lea po o le tautua e faavavau, ona o noataga a lo matou aiga ua foaia le fanua o lo matou aiga i Sinamoga aua le

Ekalesia Metotisi. E pei o le tulaga lea e toe faamamafa atu ai le tulaga lea, pei ona saunoa sui usufono, a tautua ou tuaa, o le tautua foi lona a tatou pe a maliliu tatou tuaa ae faaauau e tatou, ona o le mea moni lava, o lea lava e fai le taulaga a nai ou tuaa i le Ekalesia lea Metotisi i Sinamoga, e pei o le tulaga e faamamafa atu ai le tulaga lea.

A o le mea lea ou te fia faamalamalama lau Afioga i le Fofoga Fetalai, i le tulaga lava lea ona ua tele tagata ua fesiligia ia le suiga lea o le matou palota mai le Palota Taitoatasi i le palota lea o Nofoa Tu Taulaga i Sasae ma Sisifo. O le mea lea e fia malamalama ai tagata aua pei foi ona fesiligia e le tele o sui usufono mamalu i le faiga lea o le transfer. O lou malamalamaaga i le Tulafono, o ai lava e fai transfer pe resitala ae le i pasia le Tulafono lea o le Urban Seats, o la e ua tuu i ai e le Ofisa le avanoa e toe fai ai sa latou filifiliga pe toe transfer loa la i le Nofoa lea, pe tumau ai pea latou i o. Ae na pau le mea lea i lou malamalamaaga, o tagata uma na transfer ae ua pasia le Tulafono Tau Faaofi, ou te talitonu, e le tatau ona toe transfer. E pei o le mea lea ou te tau maua atu i le saunoaga a le sui usufono mamalu, o lea na transfer nei, ae toe transfer taeao.

O le tulaga lea i le Nofoa Tu Taulaga, a faapea na e transfer i le taimi lea na o atu ai i tua le aufai resitala pe na resitala foi i le taimi lea ae le i pasia le Tulafono lea o le Nofoa Tu Taulaga, o la e ua toe tuu i ai le avanoa e toe fai ai la latou filifiliga, pe a faapea lona o lo o afifio ma papaaao i ni fanua umia saoloto po o ni fanua lisi a ni Ekalesia. E pei o le tulaga lona o lea e tau faamanino atu.

A o le tulaga ia i le eligibility o le paia ma le mamalu o le atunuu o lo o fia lagolagoina se sui usufono o le palota lea o le Itumalo Tu Taulaga i Sasae ma Sisifo, na pau lava le mea ia mautinoa, o lo o afifio ma papaaao i luga o ni fanua umia saoloto a i latou lava. Ma o le pau lona o le criteria lea e faamamafa e fai ai le latou resitala i le mea lea, ae tuu pea i ai le filifiliga ia latou. A faapea foi e matai nisi, o le option lava lona, e le o faamalosi foi e omai e resitala i freehold, a o la e faaoga latou suafa matai e o i ni itumalo o latou fia palota ai.

FOFOGA FETALAI: Malo. Se i tulai atu le faauilavea. Tulai mai le sui usufono mamalu mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, o le vaega lea sa saunoa i ai le sui usufono ona o lea sa tautalagia i lau lauga, ou te talitonu pei ona ou talanoa atu, e tatau ona laugatasia uma tagata i le Tulafono lea e 5 tausaga faamalieina ona transfer lea, leaga o lea e ave le faatagaga i tagata i lalo e fia o i luga i le lola fou lea o le urban seat, e tusa lava pe le i atoa se lima tausaga talu ona e transfer.

O le tulaga la lona o le faafitauli lea e tulai mai, aua o lea ua uma ona fai e isi a latou resitala i le amataga o le tausaga nei po o le tausaga na tea nei, a o lea ua toe transfer i le taimi lenei, ona na pau lava requirements la e i ai, aiaiga la e i ai, ia faamalieina aiaiga o le Tulafono i le ono masina o e nofo i sou fanua i totonu o itumalo nei.

O le faafitauli lona e tatalo atu ai ia silafia e le Matagaluega, e tatau ona toe tagai i le vaega lea o le Tulafono ona o lea o le a pei i lou faauigaina, ua tele tele le favour lea ua ave i sui usufono ia, ua tele tele le avanoa lea ua tatala i

sui usufono ia ae taofia avanoa mai isi sui usufono. A ia laugatasia uma le Tulafono ona lelei lea. Ma le faaaloalo lava.

FOFOGA FETALAI: O lea ua maua lou finagalo. E manatu foi o lo o malamalama le faamalamalama a sui usufono mamalu, ae lafo maia, o lea ua faafofoga atu le Minisita ma le Matagaluega. A o lea e manino le faamalamalama a le sui usufono, o e na resitala ae le i faatinoina le Tulafono Tau Faaofi. A o lea ua faafofoga le Matagaluega, o lea foi ua faafofoga atu le Minisita, lafo mai laia o le atugaluga o le sui usufono o le a toe auiliili i ai, ona maua lea o se tali i se taimi vave.

Tulai mai Papaliitele e faaauau le saunoaga.

Susuga Hon PAPALIITELE NIKO LEE HANG: Faafetai i lau Afioga i le sui usufono mo Faleata Sisifo mo le faauilavea. E leai, e le o taumafai atu foi e faaleaogaina le aiatatau a nisi sui usufono mamalu o le atunuu o lo o aofia i le suiga fou lea. Na pau le mea e toe faamanatu atu i le sui usufono, o le transition period lea mo le Individual Voters lea e aofia uma ai tulaga ia ona e pei ona saunoa se sui usufono i le taeao, ua fasi faalua le gata. O lona uiga a leai se mea faapea, ua fasi faatolu la le gata i i pe a le ave se auala e ave ai foi se faamamaavega i le matou itumalo palota, ona o lea ua leai se Nofoa o le Palota Taitoatasi.

E pei o le tulaga lea e toe faamanatu atu i lau Afioga i meaane ua galo ia oe le tulaga lea. A o le tulaga lava ia, a faapea e i ai ni mea ua le talafeagai i suiga ia, o lau lava tatalo i lau Afioga i le Fofoga Fetalai, tapena se isi suiga mo le isi... pe a uma le tatou faiga palota. O a uma ni faafitauli e tulai mai i le tatou faiga palota lea o lo o loma nei, ia tatou mafaufau loloto i ai ma tapena ai foi nisi teuteuga se tele aua le faaleleia o le tatou faiga palota.

Lau Afioga, e pei o le tulaga lea, ae ua ou talia atoatoa le Teuteuga Lona Tolu o le Tulafono Tau Faaofi. Ma lou faaaloalo lava.

FOFOGA FETALAI: Malo. Ia, o le tasi sui usufono mo Salega, tulai mai lau Afioga Afualo Wood Utu Salele.

Afioga AFUALO WOOD UTU SALELE (Salega): Faafetai i lau Afioga i le Fofoga Fetalai mo le avanoa matagofie. E faafetai atu foi i le Tamaitai Minisita mo le Tulafono Tau Faaofi ma le teuteuina, a o faafogafoga foi le atunuu e tusa ai o lenei vaitau taua ua toe o se aga ona tatou taunuu lea i faiga filifiliga.

A o se manatu vaivai lava, ona o lea ua manino lava isi vaega o le Tulafono Tau Faaofi, o le vaega muamua lau Afioga i le Tamaitai Minisita, faafetai lava o lea ua e afea le tulaga lea i le tautua ua faafogafoga foi le atunuu i le tautua lea tatou te talatalanoa i ai i le Maota lenei. Aua o le upu moni lava ia, faafetai o lea e tatala mai lava i le Tulafono Tau Faaofi. E fai o le tautua matalilo, tautua matavela, a o le tautua foi o lea e aitaumalele. O lea e aofia uma i totonu i i. O lona uiga la, o lea e tele lava le avanoa mo le sui tauva. A o se vaega e agai i ai sau faamatalaga ina ia silasila pea i ai, ona faafetai lava o lea e le o maoti mai le tulaga lea i le monotaga ona e fai lava si eseese, aua a faapipii loa i ai ma le monotaga, o lona uiga, ua taoto loa ni aulape ua fau atu e tatou ina ia le agavaa ai le toatele o sui usufono. A o lea lava e lelei ma

talafeagai le agaga o le Tulafono Tau Faaofi lea ua taoto mai i le tautua, ona o lea lava e manino lona faamoemoe.

Ae pau lava lau fautuaga i lau Afioga i le Tamaitai Minisita, se i toe silasila i le tolu tausaga, po o le a tonu lava le agaga o le tolu tausaga lea, ona i le manatu lava ia o le sui usufono mo Salega, ina ia faigofie pe a taoto pea i le tofasaili ma le faautautaga loloto a alii ma faipule o nuu taitasi, aua o latou nei o lea e feagai tonu pe a fua i ai le tautua lea, e le gata o nuu, a o aiga foi sa to le pule lea e afua ai le suafa lea ua suafa ai se tamalii po o se failauga. Ae foliga mai o le tolu tausaga lea, e foliga mai e faigofie lava, ae eseese lava i lau tilotilo i ai, o se aulape lea ua taoto e ono le agavaa ai se tamalii po o se failauga ua i ai se faatuatuaga, e le gata o le itumalo, ae o nuu ma aiga, e faapea foi ma Ekalesia. Ona e le o po se lilo, e i ai lava le taimi foi lea faatoa uma le faatofalaiga a le tele o aiga, pe toe tasi se tausaga o totoe ona oo lea i le taimi e fai ai le filifiliga a le atunuu, a o le gasegase o le aiga ua leva ona taoto. Ae uma ifo faapea mai, ia sauni mai oe o oe lea o le a fai ma matai o le tatou aiga, o le a to foi i ai le faamanuiaga lea. Ona alu ai lea, uma ifo ua i ai ma le agaga o le aiga atoa ma le nuu o le a e sauni e fai oe ma sui e filifili e le tatou aiga i faalagamaea a le tatou Malo. Ae o lea ua taoto le aulape lea o le tolu tausaga.

Aua e moni lava o lea ua i ai le agaga lea e mafai ona faaauau mai pe a faapea e te fanau loa o lou nuu lava, aua o le piitaga lava lea, o le tiute lava o tatou. Ae manino lava le Tulafono Tau Faaofi, na o suafa matai. E manino mai lava le Tulafono Tau Faaofi lea e i ai. O lou popolega la lona, aua o le suafa matai la lona e agai uma lava i ai le tolu tausaga lea. E fai lava la si malosi o le tolu tausaga. O lau talosaga e valuvalusia ai aa o le fau i lau Afioga i le Tamaitai Minisita, toe silasila ane i ai ina ia mautinoa o lelei, aveese le tolu tausaga ae tuu pea i le faautautaga loloto a alii ma faipule. Faafetai o lea ua taoto le tautua, ina ia mautinoa lelei, o latou foi nei o lea e malamalama lelei i le va feagai ai o mea nei o matai ma sulii foi o e o le a to i ai le faaaloalo a aiga taitasi, ina ia mautinoa o latou ia o le a tauaveina le mamalu o aiga, o le mamalu foi lea o nuu aemaise o itumalo, faapea foi Ekalesia ma le Malo ma Samoa.

O nisi vaega o le Tulafono Tau Faaofi, ua malamalama. Faafetai lava mo le taumafai ina ia mautinoa ua saogalemu ma lelei le taumafaiga o le tapena atu o le faamoemoe mo le 2016. Ia, o lau soso atu lea i le nei aso. Ia faamanuia le Atua i fuafuaga fai o le Tulafono Tau Faaofi. Faafetai.

FOFOGA FETALAI: Malo faafetai. Ia, tulai mai le sui usufono mo Vaisigano Nu.2.

Tofa MOTUOPUAA UIFAGASA AISOLI VAAI (Vaisigano Nu.2): Lau Afioga i le Fofoga Fetalai, faafetai mo le avanoa ou te tulai atu se i fai se manatu o le matou itumalo i lenei Tulafono Tau Faaofi. I lou tagata ia, e le auai lou manatu i mea ia, i le residency ma le tautua. O le agaga o le le auai o lou manatu, ona o tatou ua taua o le atunuu temokarasi, full time democracy. O lea e saunoa soo lava le Afioga i le Palemia, ua tatou adopt ina le Westminster System. Ia te au lava la, afai ua e matai, resitala lou matai po o fea e te matai ai, o lou right lona e te alu ai i totonu o le Palemene.

O lea foi mea o le tautua, e eseese tautua, po o le tautua faa-matai, po o le tautua faa-taulealea, po o le tautua i komiti a fafine, tautua i le lotu. Ia ailoga

e i ai se isi o tatou e atoatoa se tautua? A o le upu foi lea o le tautua i totonu o nuu, o le tautua ua direct, po o le tautua e indirect le tele o tautua. O le uiga o lau tala, o le tele o tatou lea e faigaluega i Apia ma nonofo i Apia ma atunuu i fafo, a outou silasila i nuu i tua, na o le fai lava o lea... o le a le mea ua iu i ai le fonu, o saoga ia, e vili uma mai ia tatou o alo foi ma fanau, se i alofa mai o mea ia, tusa o lea e tautua le matai, o le matai lena o lea e tautuaina le nuu. Ua le iloa nei la e tatou, o le tatou lava lena tautua e fai. Ailoga e i ai se isi o tatou e le o fai faaulufalega, e faamoemoe uma mai lava i e o faigaluega, ae le iloa la pe faapefea ona faitau lea ituaiga tautua.

E pei o le mea lea lau Afioga i le Fofoga Fetalai, e faale auai tele lou manatu i lea mea, afai o lau tautua e tolu tausaga, faatoa tatau lea ona e alu i le Palemene. Se e leai, a ua e matai lava, o le mea lena o lou sau i totonu o le Palemene, o le mea lena e filifili lava e tagata o lou nuu. Afai na lelei lau tautua, ia o lena. Afai e leai, ia o lena foi. Aua a tatou o nei i le tolu tausaga lenei, o lena lava tatou te iloa. E i ai isi o lea e i totonu o le Palemene lenei e le i oo i se tolu tausaga, e le i faia se tautua. E tele foi nai sui usufono ia o lo olioli mai, ia, e pei o le mea lena lau Afioga i le Fofoga Fetalai.

O le mea foi lea i le residency, ua tatau ona aveese lena mea. Afai lava o oe o le sitiseni Samoa, ua fai lou igoa matai a o la e te nofo i Tutuila po o Niu Sila, o tagata na e sili ona tetele o latou sao i totonu o le tautuaina o nuu. Aua foi o la e tou te iloa, a silasila i nuu i tua, o a uma mea la e fai? E leai lava ni maumaga o faia, e leai ni togafai o faia, e ala ae lava i le taeao fai le pele sui, ioe. O le mea lena e eseese ai, ua tatau ona tuu lenei mea o le tautua, ma o fea e te alaala ai. Tatou o i le faa-Temokarasi, o le faa-Kerisiano moni lena. Ia manuia le tatou Fonu.

FOFOGA FETALAI: Malo. O le a lafo i lea Itu o le Maota, se tasi o sui usufono mo Falealili, Tofa Tusa Misi Tupuola, ona avatu lea i le Afioga ia Faumuina Tiatia Liuga.

Tulai mai lau Afioga i le sui usufono mamalu.

Tofa TUSA MISI TUPUOLA (Falealili): Faafetai i lau Afioga i le Fofoga Fetalai mo le avanoa foi o lenei itumalo o Falealili e fia avatu foi ni nai manatu puupuu lava e uiga i le Toe Teuteuga o le Tulafono o Faiga Palota 1969.

Lau Afioga ma le mamalu o le Palemene, ou te tulai atu e faaleo se agaga lagolago, se agaga fiafia tele i le tulaga ua i ai lenei Teuteuga o le tatou Tulafono o Faiga Palota. I lou lava talitonuga lau Afioga ma le mamalu o lenei Palemene i le Fonousa a le atunuu, o se Teuteuga ua ou iloa ua puipuia mai ai le tele o soligatulafono e tutupu i le maea ai o so o se faiga palota i lea tausaga ma lea tausaga ma lea tausaga.

O lona lua o sou manatu i le aoga o le Toe Teuteuga lenei, ua faamalositia ai le agavaa o le sui tauva, o ia o le matai Samoa moni lava na te faatinoina ai ona tiute e avea ai ma sui usufono o le Palemene, po o se sui usufono mai lea itumalo ma lea itumalo. Ou te le lagolagoina le tulaga lea o le toe lote fua o le upu lea o le tautua, leaga o le tautua e talanoa ai nuu ma afioaga taitasi. A lelei lau tautua, ua avea oe ma matai taua i totonu o le nuu. O lona uiga a leai se tautua ae matai, e tele lava upu e fai i ai a toeiina i tua. Masalo lava e leai se isi o lenei Maota na te le silafia. A o lou tu atu la lau Afioga ma le mamalu o le Maota, ou te matua lagolagoina, se i vagana lava nai mataupu laiti lava

pe tasi pe lua lau Afioga, ou te manatu o le a silasila pea i ai le Afioga i le Minisita ma le Matagaluega, o upu lava ia o lea e taoto mai o le monotaga, e le o i totonu o le Tulafono Tau Faaofi pe a. Ae o le tautua, ua manaomia ona matua define manino mai, se i aumai sona faamatalaga manino i totonu o le Tulafono Tau Faaofi, ina ia aua ne i toe feteenai ai le sui usufono lea ua molia i le Faamasinoga ma le Faamasinoga. Aua po o a lava o tatou manatu e avatu i lea ituaiga tautua ma lea ituaiga tautua, e faia lava e le Faamasinoga lana faaiuga ma e tumau lava le faaiuga a le Faamasinoga.

Ma le lona lua lau Afioga, o le mea lea ou te momoli atu ai le faafetai tele o le toe tapueina o ata nei. O lea ua toe aumai le Tulafono ma le Toe Teuteuga, faafetai tele i lau Afioga i le Tamaitai Minisita ma le Matagaluega, ua maua foi sia faamamaavega mo i matou, aemaise foi o le toe tapueina o ata o e ua matutua ma ua faigata ona feoai, a o lea ua maua le avanoa e maua ai le pule faitoatasi a le Komesina o Faiga Palota ina ia mafai ai ona faatino lea fuafuaga i lalo o se isi fuafuaga fou a o agai atu i le faaiuga o lenei tausaga.

Na pau lea lau Afioga o lou tulai atu, e lagolagoina ai lenei Tulafono Tau Faaofi Toe Teuteu aua se manuia o Faiga Palota a le atunuu o sauni atu i ai mo le faaiuga o lenei tausaga ma lena tausaga fou. Faafetai tele mo le avanoa.

FOFOGA FETALAI: Malo saunoa. Ia, Faumuina Tiatia Liuga, sui usufono mo Palauli le Falefa.

Afioga Hon FAUMUINA TIATIA FAAOLATANE LIUGA (Palauli le Falefa): Faafetai i lau Afioga i le Fofoga Fetalai mo le avanoa. E le umi se manatu na o se tuualalo. A tomanatu ou te iloa ua ova i le 10 tausaga talu ai o amata ona talatalanoa e le gata o le Malo a o lenei Palemene i le tulaga o le faasuafa mataiina o tatou sui usufono i le Palota Taitoatasi. O lea na faatinoina lena faamoemoe i le palota o le 2006.

Lau Afioga i le Fofoga Fetalai, i le tilotilo atu i le agaga o le Tulafono Tau Faaofi, e pei o le faa-Samoaina o le upu tautua lea ua fai si lautele. Ae ou te iloa o le intention o le Tulafono Tau Faaofi, o le tagata e vavalalata ma le osiganuu. O lona uiga o lau faamatalaga lea, o lona uiga o le upu e talafeagai lelei, o le tagata e fai lana monotaga.

O le monotaga, o lou auai lea i upufai o le nuu i taimi uma a o e matai. Ma o le matai, o se aiga po o se nuu, tasi lea o measina a aiga ua tofofi atu e te tauaveina ma e puipuia. O lona uiga o lau faamatalaga, aua afai tatou te o i le upu tautua, ia o au ua fai sina ou masani i le mea lea o Faamasinoga pe a uma Faiga Palota, ua tau amata ona masani i le faauigaina e afioga i alii faamasino, po o le a le intention o le Tulafono. A tatou talanoa i le tautua, o lea ua uma ona saunoa i ai le tele o sui usufono, ae so o se matai lava e osinuu, e fai lana monotaga.

O le tautua e fai lava sina maoae o le faamatalaga o le faaupuga lea, ma e leai lava se isi o tatou e le o faia, o lea tatou te faia uma lava. O le piriota foi e tolu tausaga ia le i lalo ifo o le tolu tausaga, ua talafeagai lelei. O lea a tatou mafaufau i le Teuteuga o le Tulafono ma le Tulafono o le Fono a NuU, ona silafia ai lea e lenei Palemene le taua o sui usufono e omai e fau Tulafono aua le fono lale e tigaina ai tamalii ma failauga o afioaga taitasi, aua o i ina e faavae ai. O le tiute foi lea o le tagata e sau i totonu o le Maota lenei, o le aumai o le finagalo o le nuu, pe fesoasoani i le finagalo o le nuu, ia fai ai ana

iugafono ia ogatasi ma faiga faavae ma le Tulafono ua faataatia e puipui ai le aiatatau a tagata o e o lo o tetee, faapea foi i latou o lo o tausia tulafono a nuu.

O lau tuualalo i lau Afioga i le Minisita ma le Afioga i le Palemia, a specific le monotaga, ona iloa lea o boundaries tatou te gata ai. E faaoga loa le upu tautua, ua vatele, tatou te le mafai, le mafai ona tatou tausisia lena mea, aua e agavaa uma lava tagata e oo lava i taulelea, e tautua, o saoa e tautua, le malosi o le nuu, e tautua, o faletua ma tausi e tautua, o tatou uma, o lea tatou te tautua. O malaga foi nei e o e sailitupe ai nuu i atunuu mamao, o le tautua foi le mea lena. O la e o ifo ai o tatou aiga, ma i latou o e o taitai, e le gata o aiga, ae o Ekalesia. O tautua ia lau Afioga i le Fofoga Fetalai e mafai ona aumai e isi tagata pe afai e fia o i le tauvaga o mea nei o faiga filifiliga a le atunuu.

O lau tuualalo, ou te manatu e tatau ona specific le upu monotaga, aua e ese mai le monotaga o le mea e te faia i aso uma ma taimi uma e te matai ai i lou afioaga po o lou alaalfaga. Ma lou faaaloalo lava lau Afioga i le Fofoga Fetalai.

FOFOGA FETALAI: Malo. Ia, Lefau, tulai mai le sui usufono mamalu mo Vaimauga Sisifo ona sosoo ai lea ma Tuisa Tasi Patea, sui usufono mo Sagaga le Falefa.

Tofa LEFAU HARRY SCHUSTER (Vaimauga Sisifo): Faafetai i lau Afioga i le Fofoga Fetalai mo le avanoa. E momoli atu foi le faafetai ma le faamalo i le Afioga i le Tamaitai Minisita ma le Susuga i le Pule ma le mamalu o le Ofisa mo lenei Tulafono Tau Faaofi ua opea nei i luma o le Maota.

Lau Afioga o se mataupu sili ona taua foi i le tatou olaga faa-Temokarasi le Tulafono Tau Faaofi o lo o faatalanoaina, o le aiatatau lea e te palota ai, e le gata o lou palota i le tagata e te manao i ai, ae o le aiatatau foi a le tagata ia avea ia ma sui palota e auala mai i totonu o le Maota. Ma o le tatou talitonuga faatagata ola i le aiatatau lea, o le aiatatau na aumai e le Atua, e le o se mea na aumai e se isi tagata ia oe. A faapapalagi, o le tauga foi lea, the right to vote is an inalienable God given right.. e le i aumaia e se isi ia oe.

I lau vaai la i le Tulafono Tau Faaofi, e lua mea taua i le Tulafono Tau Faaofi, e le gata o le tele o le avanoa e avatu i le tagata ia mafai ona palota, ae faapea foi le tagata e alu i le palota, a ia faigofie le auala e faatino ai le aiatatau lea. O lau faatusaga, o le 1865 na uma ai le civil war a Amerika na tau ona o le pologa o tagata meauli. Ae oo mai nei lava i le 1960 o finau Amerika i le palota o tagata meauli, ona o le Tulafono faapea e le mafai ona palota se meauli aemaise lava o lalo i le Southern States, pe a faapea e te le iloa tusi lou igoa, e te le iloa faitautusi. E uma ifo mea ia, e le aiga le aiatatau ma mea ia ua fai faatulafono ina ia le mafai ai ona palota le tagata. E mamao i luma le mea ua oo i ai Samoa, leaga e matautia le mea ua tatou oo i ai.

O lau talosaga lau Afioga i le Minisita, o le auala foi lea e faatinoina ai le aiatatau a le tagata ia palota, ia taumafai lava le Ofisa e faafaigofie, ia matuai faigofie lava, ia faigofie ai foi i tagata ona omai e faatino le latou aiatatau. O lau faatusa, a sau le tagata e resitala ia palota, e le gata o la e tau faatino le aiatatau, ae i ai foi le atugaluga o le Ofisa ia faamaoni faamaumauga. I lau vaai la i ai, o mea ia e lua e tatau ona puipui. O le mea lea ou te vaai atu i ai i le taimi lenei, e manaomia i le tulaga lea e i ai nei, e le gata o le pepa fanau,

ae tatau foi ona moomia le ata e pue mai. A faapea la e te sau e resitala oe e te fia palota ae na o le word, e tatau lava ona i ai le pepa fanau. Ae a e sau ma lou pepa fanau ae leai sou ata ae toe tuli oe e pue lou ata, o le auala foi la lea, ua faigata ona faatino lau aiatatau, aua o le isi lava tagata, e fati ai, aua a e alu e pue le ata, e alu ai foi le tupe.

I lou talitonuga faa-Loia o au ia, o le pepa fanau, o le pepa tautino a le Malo, o le pepa faaletulafono, e ao ona faaaogaina uma e Matagaluega uma a le Malo ma se isi i totonu o le Malo, se i vagana ua i ai sou masalosaloga o le tagata lea e avatua ia oe le pepa fanau, o le tagata lea e tu mai luma o oe, e pepelo. O lona uiga la e le aoga le pepa fanau. Aua o lau faatusa la, a faapea e sau le tagata ia oe e pepelo e le o lona pepa fanau lea ae tago e tuli e alu e pue mai se ata ona resitala ai lea, e le aoga le puega o le ata i le pepa fanau lea. Ae i le Tulafono lava ia i lou malamalama i ai, a alu atu le tagata ma le pepa fanau, e ao ona faaaoga le pepa fanau se i vagana ua i ai se mafuaaga e te fesiligia ai e le faamaoni. Ma o lau vaai foi i ai i le alu atu a le tagata e resitala, mo faamaumauga faaletulafono, a e pepelo i lau pepa lea, e moni e mulimuli ane maua le pepelo i le pepelo, ae le faapea e te alu fua, e molia oe e le Ofisa i lou tauto pepelo i au faamaumauga ia e te avatu, e tutusa lelei lava oe o le tagata palota ma le tagata lea e alu i le palota, le candidate.

Na o sina manatu vaivai lea lau Afioga i le Tamaitai Minisita, e le aoga le i ai o le aiatatau, ae pei o le faiga o le nifo le mea ina ia mafai ai ona faaaoga lau aiatatau.

O le isi talosaga i le Ofisa, o le mea aupito sili ona faigofie, a ia le alofia ai la le faamaoni, a ia faafaigofie i tagata le resitala. Ua ou fia vaai ma ou mana'o ia sili Samoa i le lalolagi atoa lava i le pasene o tagata e o i le palota, aua a tatou vaai i le palota lea ua tea atu, e i lalo mai o le 60pasene tagata Samoa o la e palota ia tatou, ae ana faapea e sau faiga palota e 80pasene e alu atu agai i luga tagata Samoa e faia le faiga filifiliga, o le matua matautia lava o lea tulaga, aua e oo ia Amerika, e le i oo Amerika i le tulaga lea.

Lau Afioga i le Fofoga Fetalai, e tele saunoaga ua taua le tulaga lea o le tautua. E pei ona ou taua muamua, o le aiatatau e palota e lua ona vaega, o le aiatatau a le tagata ia palota ma le palota mo le tagata e taitaia i latou, ma le aiatatau a le tagata e alu i le palota. I lau vaai la i ai pe a oo i le tulaga lea o agavaa, ua faaauau le Tulafono. E tatou te finau lava faale-mafaufauga i tulaga ia faa-Temokarasi ma mea e talafeagai mo Samoa. Ae a tatou tagai nei i le aiatatau a le palota, na pau lava le mea lea e i ai, po o le sitiseni Samoa, na e fanau i Samoa, pe sitiseni i se isi auala a o lea e te sitiseni Samoa, ua 21 ou tausaga e te le i solia se tulafono pe na e falepuipui e mafai ai ona e faaauau le aiatatau lea, ona e palota lea. A tatou fuafua i le tagata lea e candidate, o lea e i ai mea ia, o le sitiseni Samoa, ae muamua lava le matai. E leai lava se isi, tatou te talitonu uma lava o le mea aupito sili ona talafeagai mo tatou Samoa o a le matai le faa-Temokarasi tatou te alu ai, o lona uiga e le o se faa-Samoa ia tatou. E te matai, e te le i falepuipui, ua i ai le suiga lea mo le fa tausaga. Ua i ai foi le tulaga lea ia atoa se taimi e tolu tausaga o e nofo i totonu o Samoa, ma le tautua.

E i ai la le fesili ia te au faaletulafono, po o a ituaiga puipuiga e te tuua i totonu, o puipuiga o lea e faigofie ona alu ai le temokarasi ma lau aiatatau lea, ma le puipuiga e te faapea mai, pei lava o lea ua avea le puipuiga lea pei se pa foi lea e te oso ai i luga faatoa mafai lea ona faaaoga lau aiatatau lea e te alu ai as a candidate.

O le eseese la o lau vaai, o le mea lea o le tolu tausaga, o le faigofie ia. Po o ai lava o tatou e fia alu i le palota, o le faigofie ia ona siaki lau tolu tausaga. Na o le aumai lava o lou passport Samoa ave i luma o le ofisa o Faiga Palota, fai lau declaration lea e fai i luma o le Loia, o au ua atoa le tolu tausaga, siaki le tusifolau, e leai ni finauga. Ae a tatou talanoa la i le mea lea o le tautua, e eseese uma lava o tatou manatu. Ia au la, o le mea lea o le tolu tausaga, sitiseni Samoa, e faigofie, e talafeagai la ia au le mea lena. Ae a sau loa la i le tautua, e tele tele mea tatou te finau ai. A ou faamasinoina le tautua, aua o le mea lena e le pei o le tolu tausaga, e manino lava, e faigofie ona faamasino, a o le tautua la, e eseese uma lava manatu o tagata i le tautua, ma e i ai foi le isi mea lena i le tautua, o luga lava o le tagata ola. A le fiafia lava le tagata o le nuu ia oe, e le tautua le tagata lena ia matou, po o le a foi le leva o le tautua e o suesue, i aso uma o le tausaga po o masina uma o le tausaga ia i ai i fonu a nuu, lotu i le Ekalesia. Aua o mea uma la na e tau fesiligia pe a oo ina faapea. A o le tulaga la lena, o le faigata ia ona e iloa tonu po o fea e taatia i ai, e le faigofie pei o le mea lea o le matai, mautinoa, tolu tausaga, mautinoa. Na o se manatu vaivai lea i lea tulaga.

O le isi tulaga lau Afioga i le Minisita, e manino ia au le Tulafono Tau Faaofi i le tulituliaga o le tulaga foi lea o le piitaga faaleaganuu, ma e tatou te malamalama uma lava, a tatou alu i le mafaufau faa-Samoa po o le mafaufau faa-Temokarasi, o lea tatou te mana'o o tagata o le nuu lea ma tagata o le itumalo lea latou te filifiliina le tagata e fai ma sui o le itumalo lea. E leai sau finauga i le itu lea. A o lau vaai i le faatinoina o le tulaga lea, ua i ai le tulaga ua faapito ia matou i totonu o le Vaimauga. I lau vaai faaletulafono ia au ia, aemaise le aiatatau lea e i ai nei, e tatau i le Tulafono Tau Faaofi ona le tutusa ai tagata, ua le mafai ona maua ai le agavaa. O lo o i ai i le Faavae o le tatou Malo i lona Vaega 15, o lo o i ai le tulaga lea so o se tulafono po o se faiga faale-Malo tatou te faia, ia aua ne i i ai se Tulafono po o se mea tatou te faia e aafia ai se penefiti po se mea e maua e se tagata e pei o se tulaga o lona tupuaga po o lona tulaga faaleaiga.

I lau vaavaai i le Tulafono Tau Faaofi lea i totonu lava o le Vaimauga, o totonu o le Vaimauga i le mea muamua sa i ai, e palota uma lava tagata ia e nonofo i totonu o le Vaimauga vagana le tulaga lea i matai, e oo foi i le vaega lea sa palota taitoatasi. A o lea la ua vaai i totonu o le Vaimauga, i le tulituliina o le piitaga faalenuu aua o lea ua i ai ma le tulaga lea o le faaogaina o fanua saoloto.

Faafetai i le Afioga i le Minisita o lea ua i ai le suiga lea, o e sa resitala muamua i le lola a le Vaimauga i le faiga palota ua tuanai atu, e mafai lava ona toe resitala i totonu o le Vaimauga i le faiga palota lea o le a sau nei, tusa lava pe le o ausia e latou manaoga o le Tulafono ua i ai nei.

I totonu o le Tulafono Tau Faaofi, e te palota i totonu o le Vaimauga pe a faapea o lea e te nofo i fanua saoloto po o fanua faaleaganuu i totonu o le Vaimauga a o oe o le tagata e i ai lou piitaga i totonu o le Vaimauga. Ma o lea toe faaopoopo i ai ma le tulaga lea, a faapea sa e i ai i le lola a Vaimauga muamua e te i ai lava i le lola a le Vaimauga. A tuu mai la i le tagata lea e leai se piitaga i le Vaimauga, lea e fai mai le Tulafono Tau Faaofi, a e nofo i se fanua e le o se fanua faaleaganuu ae leai sou piitaga i le Vaimauga, e te alu la i le Urban Roll.

Lau Afioga i le Minisita, o i lea e i ai lou atugaluga i le Tulafono Tau Faaofi, ua ma faauau le Tulafono Tau Faaofi e ave i le tagata Vaimauga le

filifiliga. A faapea e te nofo i le... e faapito lau tala lea i fanua saoloto, a faapea o se tagata Vaimauga ei ai lou piitaga i le Vaimauga ae e te nofo i le fanua saoloto i totonu o Vaimauga, e lua au filifiliga, e te filifili pe te palota i le lola a le itumalo pe te palota i le Urban Roll. A faapea o oe o le tagata e leai sou piitaga i Vaimauga ae e te le i palota i le palota na tea nei i le Vaimauga ae e te nofo i le fanua saoloto, e tasi lava le mea e te alu i ai o le Urban Roll.

Lau Afioga i le Minisita, o lau vaai a au ia, atonu e eseese o tatou manatu. A o lau vaai i le aiatatau lea faale-palota ia tatala le avanoa. O le mea aupito sili ona taua i le aiatatau lea ia aua ne i i ai se isi e leai se auala e palota ai i le faiga palota. O lea e i totonu o le Vaimauga tagata ua nonofo i totonu o Vaimauga isi ae ua atoa le limasefulu tausaga o i totonu o le Vaimauga, a o lea e fai mai le Tulafono Tau Faaofi lea, ona o lea e te nofo i le freehold land ae leai se piitaga i le Vaimauga, e tataua la ona e palota i le urban. A faapea e te nofo i le fanua faaleaganuu i totonu o le Vaimauga, e tataua ona e alu i le mea e i ai lou piitaga e te palota ai.

E pei o lou mafaufau lea lau Afioga i le Minisita, sa ou ola mai na ou palota i le Palota Taitoatasi o le Tulafono lena, ia ou matai loa ou alu, fai mai le Tulafono ua tataua ona ou alu i Amaile ou te palota mai ai. E tasi lava le aso o lou olaga ou te palota ai, ou alu loa ou palota i Amaile, na uma loa lou aso lena e tasi, e matua le aoga lava le sui o Amaile lena ia te au. O au e nofo i uta i Vailima. A pa la lou paipa, o le mea e tupu, e le alu au i le matai Amaile lea e fai ae sau i lau mataupu lea i le matai Vaimauga.

O le isi tulaga lau Afioga i le Fofoga Fetalai, o lea ou te iloa lea e i ai tagata matou i totonu o Vaimauga sa i le lola tutoatasi e leai ni piitaga i totonu o le Vaimauga ae na savavali ese tagata ia mai le Individuals Voters Roll ae o i le lola a le Vaimauga. O le filifiliga lena sa ia i latou. E moni i le taimi lenei i le Tulafono lea ua toe faataga mai ona sa resitala muamua e mafai lava ona nonofo pea i totonu o le Vaimauga a o latou fanau la ua le lavea la i le saolotoga lea. O latou fanau lea o le a sau alu sao lava i le Tulafono lea. O le matua sa mafai ona palota i le Vaimauga ae leai se piitaga i le Vaimauga, a o le fanau la ua le mafai, a o le olaga atoa lava o totonu o le Vaimauga. Ia ua tatou malamalama lava i le olaga faa-Samoa i le tele o le vaega lea. E i ai foi i le matou nuu i Apia, o le tele o afakasi ia e i Apia e 99% o afakasi i Apia ae toalaiti lava tagata Apia ae i ai foi tagata e ese ai e le o ni tagata o le matou nuu, ae sa matou ola faatasi ifo lava. A fai au taaalo a le matou nuu ae omai taaalo uma lava i Apia. Ou te le iloa po o le a le mea o le a faeseese ai ona o nei mea o faiga palota.

Lau Afioga i le Fofoga Fetalai, faafetai i le Afioga i le Minisita, o le fautuaga ia tatala le avanoa. Faafetai i lau Afioga i le Fofoga Fetalai mo le avanoa.

FOFOGA FETALAI: Malo faafetai. Ia, ua faaiuiu mai le saunoaga a sui usufono.

O le sui usufono mulimuli Tuisa, le sui usufono mo Sagaga le Falefa.

Tofa TUISA TASI PATEA (Sagaga le Falefa): Faafetai i lau Afioga i le Fofoga Fetalai mo le avanoa, i le pau foi o le Maota nei i le afifio o sui usufono mamalu. E fia faaali foi se manatu o lenei sui usufono, talu ai ona o le taua tele o lenei Tulafono Tau Faaofi. Lau Afioga i le Fofoga Fetalai, e le

umi foi se faamatalaga, e fono faapipii foi i nisi o saunoaga matagofie ua folasia i lumamea aua foi lenei Tulafono Tau Faaofi.

O le mea muamua lau Afioga i le Fofoga Fetalai, e fia tautala i ai o le tautua. E ese le moni ma le faamaoni o upu a le atunuu, 'O le ala i le pule o le tautua.' O lou talitonuga i lenei Tulafono Tau Faaofi i le suiga o le tolu tausaga lea ua i ai le tautua lenei ua ogatasi foi ma le tolu tausaga pei ona i ai vaega foi ia mai fafo e omai nonofo i totonu o le atunuu. I le manatu la, o lea ua ave le faamalumaluga ua ave foi i le malosiaga lea i le Tulafono Tau Faaofi, e ave tonu lava ia i latou o lo o fitoitonu ma le filifiliga o i latou e tatau ona o i le tofi, le pulega mamalu a alii ma faipule, ua leva ona silafia lelei e le tofa ma le faautautaga i aiga ma tapaaui aemaise tulatoa o so o se nuu ma so o se alaafaga le tagata e tatau ma fetau lelei ona alu i le tofi. E tolu tausaga ua tatau ona lava lau tautua. E ui foi ua aumai i totonu o le Tulafono Tau Faaofi e le o manino lelei, o le uiga o le faamatalaga ua tatala le definition o le upu tautua. E talitonu e pei lava o tu ma aga e masani ai le tatou atunuu. O le tautua lava, o le tautua tuavae, tautua matavela, tautua upu, tautua aimalele. Aua e moni lava o le toatele o nisi tagata o lo o tautua mamao mai fafo i atunuu mamao. E le gata la ina fai o le monotaga i totonu o nuu a o lo o lafo mai foi tupe i totonu o aiga ia e faatino ai mea fai a le nuu ma Ekalesia. Ae le gata foi i lea, a malaga atu le tele o Faalapotopotoga i atunuu i fafo o lo o fai foi le tautua. E talitonu la le taofi, e le o fai mai foi le Tulafono Tau Faaofi, a faapea e te matai e tasi le tausaga e te matai ai lea a o lea ua aumai e tolu tausaga e fai ai lau tautua. O le talitonuga o lenei sui usufono, e le o talanoa mai le suiga o le Tulafono Tau Faaofi lenei i le matai, o lo o talanoa mai i lau tautua. E tusa lava pe tasi lou tausaga ae a faapea na fai lava lau tautua mai lava o e laitiiti i totonu o le nuu, e talitonu ua e agavaa foi e pei ona aumai e lenei Teuteuga. O lou talitonuga la, e ese le manaia o lenei Teuteuga, e fesoasoani ina ia faafaigofie ai foi le filigamafua.

O le filifiliga a le nuu ma alaafaga po o ai le sui e tatau ona avea ma o latou sui tauva i totonu o upufai o Malo e ala i lenei foi faamamaavega a le Tulafono Tau Faaofi ina ia faafaigofie ai a latou filifiliga. Ona avatu ai lea ma sau tuualalo ua manaia foi ma matagofie, faafetai foi i le Minisita e ana le Tulafono Tau Faaofi, ua manaia ma matagofie le suiga ua i ai nei le fa tausaga ua sui ai foi mai le lua tausaga lou agavaa. E fa tausaga e te agavaa ai ua avea oe ma sui usufono mamalu o le Maota pe a faapea e te le i aafia i le Tulafono. Ae a faapea foi ua i ai le suiga lea ua sui mai ai i le lua tausaga agai le fa tausaga, ua manaia tele foi ua ono tutusa ma le suiga pei ona i ai pei ona taua i luga atu.

A o le tuualalo o lo o i ai i le Vaega 1B, o le form lea, o sina vaega lena pei ona i ai a faapea o oe e te solitulafono i le corrupt practices, ia lena ua sui mai le sefulu tausaga i le lima tausaga. O se tuualalo lava ia ae a faa-fa tausaga ina ia faafaigofie uma ai, e fa tausaga a e solitulafono i se soligatulafono pe o se solitulafono foi i corrupt practices e fa tausaga. E talitonu foi o nai tagata foi o nai tagata o lo o afaina i lea tulaga o le corrupt practices o lo o i ai lava nai cases foi ia o lo o manino lava foi, talu ai ona... ae le tele se faaletonu tele o lea tulaga ae pei o se tuualalo foi lele ina ia toe silasila i ai le Afioga i le Minisita, aemaise foi le Matagaluega o lo o fitoitonu ma lenei foi Tulafono Tau Faaofi, se i toe tagatagai ane i ai pe le onomea ona toe faatutusa loa ia tai fa tausaga uma.

FOFOGA FETALAI: Malie le sui usufono sei tulai mai le faauilavea a le sui usufono mamalu mo Vaisigano Nu.2.

Tofa Motuopuaa Uifagasa Aisoli Vaai: Na ona fia fesili atu lava i mea e fia malamalama ai lou sui usufono ae le i nofo i lalo le Afioga i le sui usufono. O lea na saunoa mai o le tolu tausaga lea o le tautua, o lea e faapea e tolu tausaga e te tautua mai ai e tusa lava pe te laitiiti e te le i matai. Po o le sao lea lau Afioga i le sui usufono, aua e le o taua maia se matai, e tolu tausaga o lau tautua ae tautua lava i le E pei ona saunoa i ai le sui usufono, pe na e ola mai totonu o le nuu e tolu tausaga na e tautua ai ua e agavaa. Pe o le sao lea pe leai, ne i te i ua sese lau faalogo lau Afioga i le sui usufono mamalu.

FOFOGA FETALAI: Malie le sui usufono se i tuu atu le avanoa i faauilavea lona lua.

Tofa Lealailepule Rimoni Aiafi: Ou te talitonu o le faamamafa o le Tulafono Tau Faaofi, o le agavaa o sui e tauva ai aua e i ai lou talitonuga, a e faipule ae falepuipui pe tasi lava le masina e le tatau ona e toe faipule. O lou lea talitonuga, pe lua masina pe tolu masina, aua e te alu loa i uta i le falepuipui e tatau ona toe sau se isi e sui lou nofoa.

Sa tatau i lou talitonuga i le vaega lea o le Tulafono Tau Faaofi, o lea e talafeagai mo sui e fia tauva ae o le faipule ia e once e convict ae a falepuipui pe masina pe lua masina e le tatau ona toe faipule, ma lou faaaloalo lava. Aua a fa tausaga lea e tuu i ai, ia tailo?

FOFOGA FETALAI: Ia, finagalo malilie sui usufono, o lea lava e tuu mai le lauga a le sui usufono ia i lona finagalo. Tulai mai e faaauau le saunoaga.

Tofa TUISA TASI PATEA: Ai ua galo i sui usufono e le i taua i a la lauga muamua ae o lea ua.... Ia faafetai foi mo le avanoa ua maua. Ae fia tuu atu le fesili ona o le talitonuga o lo o i ai foi nisi o tatou e... afai e tasi le tausaga e matai ai e pei e foliga mai ua le talafeagai le tolu tausaga lea e aumai e le Tulafono Tau Faaofi e faatino ai le tautua.

O le agaga la o le faamatalaga e tusa lava pe tasi le tausaga, o se faataitaiga pe a faapea ua fai sou matai i le tausaga lea na tea nei ae sa fai lava lau tautua i tausaga i tua atu, o le a le isi mea e te popole ai o la sa e tautua. E pei o le tali atu lea i le faafesili.

FOFOGA FETALAI: Ia faamaea maia le saunoaga a le sui usufono ua maea lou taimi.

Tofa TUISA TASI PATEA: Ia ona faamuta ai lea o sa matou faamatalaga, faafetai tele lau Afioga i le Fofoga Fetalai, masalo pau lena o nai motugaafa foi aua lenei Tulafono ae ese le taua o lenei Tulafono, ae faafetai tele.

FOFOGA FETALAI: Malo. Tulai mai le toe saunoaga o lenei aso lau Afioga i le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai, e tulai atu ma le faaaloalo, o le mea lea o le tautua, e leai lava se isi e tali mai, o le faiga filifiliga a le itumalo, e iloa lelei lava e le itumalo le tagata faatoa oso atu nei alu i le palota, e iloa lelei lava e le itumalo, e le palota foi i ai le itumalo.

Lau Afioga i le Fofoga Fetalai, o le ala lea ou te le talia ai le tolu tausaga lea, leaga e tali lava le itumalo i le tagata e toe sau i le palota. O le isi tulaga lau Afioga i le Minisita ma le faaaloalo, e faaituau le mea lena e tolu tausaga, e faaituau ia tatou lea ua i ai i le Maota i le taimi lenei, aua foi e le afaina ai tatou, a o nai sui faatutu ma latou aiatatau. O lea sa sui nei le Faavae ina ia sefulu pasene o tamaitai, lau Afioga i le Fofoga Fetalai, o le tele o tamaitai na fia o i le palota o le a le mafai ona o i le mea lea, o le tolu tausaga lea. O le ala lea o le taumafai atu o lenei itu, ona o le taua o le mea lea. E faaituau e le tutusa le malae lea e tatou te taaalo ai ma nai sui faatutu ia, ona o le tolu tausaga o le mea tele. Ae ou te fai atu, e fai lava e le itumalo le faaiuga, tusa pe tolu tausaga pe le tolu tausaga o lau tautua, e le palota le itumalo ia oe pe afai e faatoa e oso atu nei fai lau tautua, a o lea ua faatulafonoina e tatou. O le mea aupito sili lena ona ou le taliaina le mea lea vaeatu lau Afioga i le Minisita, ina ia silasila totoa i ai, aemaise o tamaitai, sui tamaitai, lea na outou mananao i ai a o lea ua outou toe teena, e ala i le Tulafono lea. O le mea la lea lau Afioga i le Fofoga Fetalai ma le Maota, o le matua faaituau o le Tulafono lenei, tusa o lea ua puipui tatou, o tatou lea e saofafai i le Maota. Ae a faapefea nai la uso o le latou aiatatau e fia o i le tofi? Ia pau lea o sina au fesoasoani atu, e le faia, e fai lava e le itumalo, pe e te tautua pe a? e tali mai lava le itumalo, e le aumaia oe i le Maota pe afai e te le i tautua. Ma le faaaloalo lava.

FOFOGA FETALAI: Malo. Se i avatu le avanoa i le faauilavea a le Afioga i le Minisita. Tulai mai lau Afioga i le Minisita mo Tina ma Tamaitai, Atinae o Nuu, Afioaga ma Agafesootai.

Tofa Hon Tolofuaivalelei Falemoe Leiataua: Faafetai i lau Afioga i le Fofoga Fetalai ma le mamalu o le Maota. E tulai lava ona e i ai lava le popolega i saunoaga faapea, e teuteu lumafale, ae leai lava ma se uiga o le mea lea e saunoa i ai le sui usufono. Ia silasila foi pei ona ou fai atu i le itula ua sola, o le tolu tausaga lea na faavae muamua ai o le sau o le tagata la e i fafo ua matai ae fia alu i le palota, sau lea nofo i inei i totonu o le tolu tausaga. Ae afai la o le tagata e sau i totonu o le tolu tausaga sau nofo i inei ae leai se tautua o faia. O le a la lou manatu i le mea lena, e leai se tautua o faia? Na o le saoloto lava o ia e sau tuu le igoa i totonu o le Lola ona alu lea nofononofo i Apia.....

Afioga Hon Palusalue Faapo II: Lau Afioga i le Fofoga Fetalai, o le a le mea e te popole ai? A oo i le taimi o le palota, e leai se isi o le itumalo e palota i ai, o le mea lena.

Tofa Hon Tolofuaivalelei Falemoe Leiataua: O lau lava lena mau.

Afioga Hon Palusalue Faapo II: E leai lava ma se itumalo e nofo palota i se tagata e sau e leai se tautua.

Tofa Hon Tolofuaivalelei Falemoe Leiataua: O le mea foi lea e te nofo ai ma faaleaga le finagalo o tina, e pepelo uma mea ia e te faia. Na o lou faia o upu e faaoloataua ai tina, ae o la e faafofoga mai tina i aoaoga ma polokalame ia e fai, o le tagata e nofo i le nuu, ma tautua le nuu, ma fai lona matai.....

Afioga Hon Palusalua Faapo II: Lau Afioga i le Fofoga Fetalai o se mea e fia faasao. O lau telefoni lea e tavili mai ai tina nei lava, e matautia le Tulafono lea, o la e tavili mai tina o la e fia o i le palota, ae fai loa le Tulafono lea, ua le o nai tina. E.... o le upu moni lava.

FOFOGA FETALAI: Malilie sui usufono, e le faataga ni telefoni i totonu o le tatou Maota, tape a outou telefoni.

Tofa Hon Tolofuaivalelei Falemoe Leiataua: Silasila i ai, e na o mea lē aivaā mea e saunoa i ai le sui usufono lea le Taitai o le Itu Agai, ou te alofa i ai, ou te alofa i ai ma le faaaloalo lau Afioga i le Fofoga Fetalai.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, ua ou te i i le musumusu mai nei o le Afioga i le Minisita mo Tupe Maua ia te au, o le mea tonu lava lea na ou pau ai. O le Taitai o le Itu Agai faatoa sau, a, ia pau ai loa si Toeaina nei.

Tofa Hon Tuiloma Lameko (Minisita mo Tupe Maua): O le mea e fia faasao, e sao lelei lava, o le mea lena na ou pau ai.

FOFOGA FETALAI: Ia o lea la ua maua oe i i, o le mea lena na fai atu ai.

Ou te manatu, ia ua tatou taunuu i le tatou taimi malolo, ia e i ai le agaga ma le faamoemoe ua lava le tatou Fono i lenei aso ona o lea ua tatou taunuu i le tatou taimi malolo masani.

E momoli atu le faafetai tele i le paia ma le mamalu o le tatou Maota, ia e piipiiama lava ona o le tasi o Tulafono taua, o le ala foi lea o le tuu atu o le avanoa se i saausi pea le faasoa, aemaise o la outou tofa tatala ma le tofa saili ona o le taua o lenei Tulafono o lo o agai mai ona o le Tulafono e tatou te aafia uma ai i le faiga filifiliga a le atunuu.

E momoli atu le faafetai tele i le paia ma le mamalu o sui usufono sa tulei saunoa mai i le taeao e oo mai i lenei taimi, ia o le a mataitu pea le vaavaai a au nei o le Fofoga Fetalai ma le Taitai o le Malo, po o a aga o le aso a taeao aua o lea e le i tali le Minisita ma le Malo, ia ona tatou fetuunai foi lea pe tatou te 24 itula, ma o lea e tuli a tatou polokalame mo le tatou Aso Faraile e le tataua ona toe tuua se galuega i le Aso Tofi ma le Aso Faraile. Ae o le a fua i le tala o le tau ma le uumi o a outou saunoaga ia ma lo outou faauilavea soo, aua a tuu lava le saunoaga a le sui usufono ia e alu, ia ona leai lava lea o se mea e tatou te vevesi ai.

A o le agaga ma le faamoemoe o lenei aso e faafetai atu i le paia ma le mamalu o le tatou Maota o lea ua faaiu le tatou galuega i lenei aso, tatou taupule ola mo le aso a taeao, e taitai ai lo outou soifua manuia. Faafetai atu i le paia ma le mamalu o le tatou mafutaga ua faatasi i lenei aso i Faauluuluga o Matagaluega aemaise o le aufaigaluega, ia tatou taupule ola i le aso a taeao.

Ae le i faaiuina le tatou Fono, ou te tatalo atu i lau Afioga i le sui usufono mo Vaisigano Nu. 1, ia e talitonu o lena lava e mafanafana lou finagalo ma lou nofo toatasi, ia tulai mai e fai le tatou tatalo faaiu ona tatou malolo ai lea.

Na tolopo Taulumaga a le Fono Aoao i le itula e 1:00 i le aoauli, seia aulia le itula e 9:00 i le taeao o le Aso Lulu, 12 o Aokuso 2015.